



T2732/3148

10





皇明嘉隆聞見紀卷之十

丁巳嘉靖三十六年

春正月乙卯朔 上不御殿○改都御史阮鶚與撫福建其浙江事務  
命宗憲兼理文華輩撓之也及行宗憲盡擧其兵困之○裕王第一女  
生遣駙馬都尉李和告奉先殿○詔賜故南京兵部尚書韓邦奇祭葬  
贈太子少保謚恭簡邦奇朝邑人博學多聞篤於行誼學務實踐不為  
空言一時學者咸宗之時以陝西地震卒撫按為請祭葬故卹典有加  
○湖廣鄖陽府地震○南京吏科給事中張師載等疏陳考察事宜言  
君子小人之辨其幾甚微君子孤立寡合未免取忤於俗小人阿諛  
罷足以彌縫於人考察大典要當辨心術之微審是非之真以為去留  
毋分崇卑毋間遠近毋拘常數毋追既往及欲開陳事跡昭示賢否吏  
部議覆從之○詔封閉遷安縣荆子峪撫寧縣牛欄峪昌平州大長峪

塔佛大學漢和  
圖書館珍藏印

曠洞罷勿開採○二月捕司禮太監李彬下獄論死籍其家錦衣都督陸柄劾奏彬侵盜帝真工所物料及內府錢糧以數十萬計私役軍丁造墳黑山會起丁字大券僭擬山陵大不道宜寘之法 上命捕右法司當盜大祀神祇御用等物律與其黨杜泰木庚王愷皆論斬發遣如律沒入其貲銀四十萬有奇金珠珍寶不可勝計○吏部尚書吳鵬左都御史周延以考察庶官先自陳乞罷 上命盡心甄別賢否詳慎去留不允辭○詔罷戶部左侍郎謝九儀兵部左侍郎沈良才時大計京官九儀良臣自陳有旨改用及科道官趙鉞等考察拾遺無九儀良才名特旨罷之亦異舉也○三月倭寇掠寧波府初梁莊之捷徐海等敗死其渠魁王直復糾倭衆六艘約三千餘人入太平波岑港登陸四掠焚戮慘甚總督胡宗憲方議招納按兵不擊參政如燾請出師不聽○虜寇常樂堡副總兵陳鳳逆戰死之詔贈官廕祀如虜以數百騎由延綏

鎮遠墩入寇常樂堡鳳率其次子守義督兵逆之虜衆不敵鳳死守義亦被創巡撫石永以聞 上嘉其父子忠勇賜如祭葬贈左都督世襲加鳳長子官三級守義進都督僉事仍命立祠榆林祀之○擢總督陝西三邊右都御史賈應春為南京戶部尚書以副都御史王夢弼為兵部右侍郎代之○擢總督湖廣川貴右都御史馮岳為南京刑部尚書以兵部左侍郎王崇謙右副都御史代之○勅禮部冊封皇女為嘉善公主○宛平縣民張道等奏進靈芝詔賜布絹○巡按山東御史毛鵬請設預備倉從之鵬上言比者郡國一遇災賑動請國儲殊非救荒良策州縣預備倉之設本以濟荒近多廢弛所宜亟行修復今東昌既已繕葺可聽其便宜入穀其濟交青菜登五府宜嚴督所司建置責令依期儲穀備賑從之○擢吏部左侍郎孫陞為南京禮部尚書○山東沂州雨水雹大者如盂小者如鷄卵平地厚尺餘徑八十里損傷人畜無

筭○夏四月戊子熒惑逆行始從亢歷角天門入軫至是夜凡逆行二舍有餘○虜入薊州塞副總兵蔣承勳禦虜死之詔加贈廕虜酋打來孫等擁衆十餘萬入薊州桃林口踰建昌營滦河掠永平諸邑承勳率衆禦之敗死越二日出境總督王忬以聞 上曰虜入犯近畿殺將肆掠各官不能防禦又不能追敵爾等不從重參治顯有庇護之情姑不問其令御史覈實以聞贈承勳都督任一子正千戶既而御史奏劾總兵歐陽安等 上怒奪忬右都御史止以右侍郎兼僉都御史視事巡撫都御史張祉謫大理丞安奪都督各仍舊視事○詔修薊鎮邊牆上諭大學士嚴嵩頃虜犯薊鎮其與部臣許論吳嘉會計防所當預者嵩對言流河口牆缺乘虜進入紐於得利後爾騷擾宜將各口原修未完邊牆作速脩補 上因問邊牆果起何時祖宗時不知亦有因改之者先代何朝爲上今修還當遍閱嵩言臣考自五代石晉時割幽薊等

十六州之地與契丹遼金相繼宋未能復至我太祖始逐元君此地復爲中國有乃命徐達起古北口至山海關增修閔隘以爲內邊成祖于此建都益加繕治累朝以來缺壞即脩後又專設東西巡閱御史每歲閱視昨庚戌後凡京畿邊牆通議修築費銀百萬古北口一帶頗稱完固今口牆亦脩完昨賊從流河口桃河口劉家口此三處衆謂山險賊不能到牆未脩完不意賊即從此入今宜嚴勅督撫遍閱脩補專責巡閱御史閱視以後賊從某口入即治本口原修官之罪如此人方知警事克有濟既而論等復條上七事言修補邊牆以固險隘充實主兵以脩戰守補練營兵以重根本豫處錢糧以防春夏補給兵馬以護陵寢議處宣大以固門戶嚴密擺邊以遏虜衝得旨薊邊已修六年所費不知凡幾今却稱未完以致賊入姑記督撫官之罪王忬等其亟覈修築之數以聞○原任南京吏部尚書朱希周卒贈太子太保謚恭靖希周

崑山人學行醇篤恬於世利居官守正士論推之○倭犯江北先一舟自如皋縣掘港登岸焚劫才七十餘人官兵合勢急擊殲之于白蒲鎮○奉天等殿門災是日晡時雷雨大作至昏雷火起奉天殿延燒謹身華蓋二殿文武二樓奉天左順右順午門及午門外左右廊一時盡燬火次日始息群臣各上疏慰問上命各加脩省既而告災於郊廟社稷布詔天下上諭禮部正朝係出治之地上下同責勿但朕罪茲二十二日舉祀高玄大典止封停刑百官依脩省例五日乃止○江北倭寇至海洋二洲掘港呂四場諸處登岸凡二千餘人流劫海門縣進犯如舉泰興○詔工部脩飾端門外東西廊房給六科中書科暫住○詔議脩奉天諸殿大學士嚴嵩言人工興修一節臣等查得永樂十九年三殿災至正統間方議修復存大戒也然其時奉天門在即以為正朝今次事有不同所當速議修復但工程重大殿與門或以次興工于是

上諭礼工二部曰殿庭無不復之理當仰承仁愛毋賣直為忠徂時作敬方可不然恐貽患難圖也禮部尚書吳山工部尚書趙文華等因言正朝重地亟宜脩復但經營須有次第當酌議奏請上曰茲先作朝門為是殿堂隨次為之一應事宜議定以聞○五月倭寇犯泰州諸處時有倭舟七艘自金沙登岸復犯如皋至泰州轉掠揚州山東及徐州官兵禦之皆潰遂薄新水關矢及城中又進犯天長縣都司沃田把總丘君寵禦之皆敗死賊遂入縣治劫掠已而由石梁趨盱眙縣復攻入之遂突犯泗州攻城不克分衆犯清河攻入縣治縱火焚掠而去遂侵淮安府入安東縣焚劫○遣虞衡司郎中戴愬查驗各處大木時工部會議修復殿朝門午樓請先宣示神木廠通州溱縣至儀真龍江關蕪湖等處遺留大木解京興工上調查料過半方可興工故遣愬查驗○江北倭至揚州營于灣頭鎮數日遂犯高郵入寶應縣信宿而去突

犯淮安掠船四十餘艘旋復入寶應燒燬官民廨舍掘縣北土壩泄上  
河水入乃架舟遡東鄉由鹽城至廟灣入海居數日開洋東遡○命工  
部右侍郎劉伯躍兼會都御史總督四川湖廣採辦大木改戶部右侍  
郎張舜臣于工部提督大石窩採石○嘉善公主下嫁駙馬都尉許從  
誠從誠保定府定興縣人也○詔發太倉銀五萬于薊鎮修邊○六月  
淮揚兵備副使于德昌等督兵擊倭賊於東鄉縣敗之德昌督水陸兵  
叅將劉顯率苗兵直前衝賊親斬其渠首賊眾披靡諸軍鼓譟繼進賊  
走爭舟我水陸兵夾擊之斬首百餘級多焚溺死者餘眾退泊雲梯關  
尋去刀門港遁○巡撫鳳陽都御史王浩以倭勢猖獗請給旗牌許之  
○詔駙馬都尉許從誠于後軍都督府帶俸給歲祿二千石米麥蕪支  
○恭誠伯陶仲文病且革獻進歷年所賜蟒王金寶冠及銀萬兩且言  
子孫甥婿俱躋榮顯身後恐不能保 上受其所獻温旨慰答之○停

止陝西採礦○秋七月詔發太倉銀三萬兩給光祿寺支用○發太僕  
寺馬一千五百匹給宣府鎮新選遊兵○詔順天府置辦玳珠四十萬  
顆有奇廣東採辦玳珠九十萬顆有奇○發太倉銀三萬兩于薊鎮二  
萬兩於延綏為秋防客兵之用○福建撫臣進龍涎香十六兩廣東撫  
臣進十九兩有奇○八月山東楊嶽縣治地中湧血馬尺餘○議更奉  
天殿名 上諭大學士嚴嵩殿名奉天自己坐是已即天也此意不知  
皇祖何取嵩因言讀聖諭仰窺聖德不以天自居謙冲之至然臣聞傳  
記有曰天子至尊無上又曰人君其尊如天此係先儒之言其原出孔  
子作春秋繫王于天稱天子曰天王此孔子之言後世莫易又書言天  
命天討人君賞罰一歸于天皇祖取義或出于此伏思祖制已久頒勅  
禮官集議以俟聖裁 上曰卿解奉天二字甚正第聖賢所謂非是題  
扁之用遂諭禮部曰昨承恩示未可諉之氣數先代儒臣有言君心通

乎天心夫以人君奉天百為萬用孰非天者豈止刑賞大事始謂奉天  
皇祖命名取義在此然于已身坐之終未安也况災燬初羅建文自作  
人孽今次而蒙昭示名稱之舊決不可復其會官集議以聞于是禮部  
會議上言皇祖肇造之初名曰奉天者以人君受天命為之子故昭揭  
以示處耳然既以奉天命名是昊天監臨儼然在上而臨御之時坐以  
視朝仁人奉若之意委屬未安仰惟聖明有作禮樂一新顧此殿名獨  
仍舊貫茲當修復之時乞睿斷更定以答天庥 上曰會議已明俟至  
期奏祭於南郊太廟更之○詔罷工部尚書趙文華尋削籍為民謫其  
子錦衣千戶懌思戍邊先是文華視師江南贖貨殃民要功僨事 上  
亦稍聞之及還京以金二萬兩金絲床幄一具餽嚴世蕃世蕃姬共二  
十有七人各金翠髻粧一奩世蕃以為薄已啣之而文華官大司空加  
少保日驕亢與世蕃不相容世蕃思所以中之 上素以文華能任勞

時三殿大工方興 上以屬文華而欲先建正朝門樓責成甚急文華  
雖慄然實無應卒理劇才不能以時奉旨 上滋不悅世蕃乃為疏  
草遺文華使移疾請假 上曰今大工方興司空乃其本職趙文華既  
有疾令回籍養病然 上既稔知文華罪惡雖斥去意猶未平會其子  
懌思請假送親回籍時 上方以聖旦祈典止封而疾猶所忌怒曰止  
封限內乃敢稱病于是令司禮監覘視真偽及小內監至文華箕踞暢  
飲內監曰上令我來視疾君疾云何文華狎而戲之曰吾第飲酒耳何  
疾且贈遺復薄內使嗔之以實入告 上怒甚乃以文華江南諸不法  
罪狀示大學士嚴嵩欲殺之嵩知為世蕃所中恚曰吾家心腹一旦敗  
亡何以勸後乃具疏申救伏謁西苑移日內侍屢偵以聞 上手批曰  
文華卿子也安得不救然朕之臣也以臣欺君其速殺之嵩復具疏伏  
謁如初 上乃霽顏手批曰慰嵩老文華放還矣嵩老慰乃削籍罷歸



懌思戍邊文華道卒或云仰藥死文華初憑籍嵩資要結上寵既以  
睚眦殺張經陷李默及再出江南人畏如虎所至望風媚附贓賂填溢  
與世蕃比周作惡朝野以目一旦斥去中外稱快○改刑部尚書歐陽  
必進為工部尚書文華既罷上令推勳能堪司空任者以名聞吏部  
以必進應詔上疑其年老問大學士嚴嵩嵩曰必進雖年六十精力  
尚健前建重城多著能績上乃用之○召南京戶部尚書賈應春為  
刑部尚書○重建午門興工○九月詔祀故大學士顧鼎臣於鄉鼎臣  
居崑山始建議造城比倭入寇東南諸郡邑無城者悉遭屠戮崑山獨  
以城全郡人追思之請立祠以崇報詔許之○改南京工部尚書馬坤  
為南京戶部尚書○虜入鴈門塞時虜衆二十萬破應州四十餘堡攻  
鴈門關巡撫都御史閔煦乞兵應援總督宣大侍郎楊順見以為失律  
當坐乃令總兵殺避虜民婦上首功以自解得不罷去○殺前錦衣緹

歷沈鍊于宣府市初鍊至保安州里中人爭館穀之使弟子從學愛甚  
父老問知其故則相詈嵩父子鍊亦大詈之因束芻為偶人三日為林  
甫檜及嵩而射之以泄忿嵩父子聞之益鄙鍊而前後總督多殺避虜  
人為首功以掩敗鍊復忿懣貽書誚讓既而總督宣大侍郎楊順至掩  
敗益甚鍊諫之語益峻且為詩及樂府歌之順大恚恨陰嗾經歷金紹  
魯指揮羅鎧走白世蕃謂鍊結客為復讎計世蕃以問巡按御史李鳳  
毛鳳毛曰似有之然予已解散其黨矣尋遷鳳毛光祿卿以路楷代鳳  
毛世蕃又以鍊為囑楷至則與順共為計適有白蓮社妖人通虜者順  
亟捕之乃竄鍊名于其籍中以謀叛聞下兵部議舉朝皆知其枉而尚  
書許論竟不為雪理悉如順楷欲嵩擬旨殺之藉其家乃任順一子錦  
衣千戶擢楷太常少卿順疑嵩償祿薄意其毒鍊未足復取鍊二子箠  
死又逮其長子生員襄日考掠之幾不免及順楷敗乃得脫於禍○戊

辰彗星見於天市垣內列肆星旁芒長尺餘東北指至十月二十三日而滅○哈密衛都督米兒馬黑木乞貢許之米兒馬黑木為土魯番所侵乞內附既處之甘肅至是援沙州都督日黑刺例陳乞特從其請○冬十月亥嶽諸山獻芝先是 上屢諭亥嶽諸山採獻鮮芝逾九月者勿上至是進獻一千四百餘本既而巡按北畿御史馬斯臧獻二十本巡撫河南都御史潘恩獻二十有五本布政使林茂和獻二十有二本四方繼上者不可勝計鄆縣民亦獻二百八十一本詔賞以金幣○重建三殿興工先是 上諭禮工二部先後朝門餘次及之既而又諭內閣昨計殿建亦不宜遠須今冬破土治木仍如門建叩於上玄文武大臣乃捐俸助大工役于是皇妃嬪御等共助銀五萬九千九百餘兩詔工部收用唐王榮王各助銀五千兩晉王二千兩并下璽書優獎大學士嚴嵩成国公朱希忠錦衣都督汪炳各助銀一千兩大學士李本徐

階戚畹方承裕駙馬謝詔許從誠各五百兩餘官有差至是 上諭群臣皇天眷朕新作朝堂而聽治以是月二十八日建工預奉告於玄極殿及大高玄殿百官吉服視事法司停刑○十一月詔以災傷免山東濟南東昌兗州諸州縣衛所稅糧如例仍命有司加意賑濟○山東鄒縣地震○遼王獻大木七根銀二千兩襄王獻大木十二根銀三千兩各賜勅獎諭○詔逮繫襄陽知府李一經工部郎中戴懋儀真知縣師儒詣京訊問俱黜為民以採木侍郎劉伯躍劾其抗違勅旨遲誤大工也○賜故應天府丞朱隆禧祭葬隆禧先以方術幸詔加禮部右侍郎致仕至是卒請卹典禮臣執弗與 上曰隆禧于朕有調護之功其所進藥方及香衲諸物至今在御宜特予之不為例○重建大朝門興工上親告大高玄殿○海寇王直就擒初直寇岑港總督胡宗憲欲戰而慮不勝乃力主撫議檄總兵官盧鏜往來直舟以鄉曲誘之約直來

官以都督置司海上通互市直信之亦自分言能肅清海波遂與毛海峯葉碧川挺身來見宗憲以賓禮遇使指揮為其館主給與肩輿出入復出蔬米酒肉供餽其舟人日費百餘金且交質為信保無他虞宗憲以狀上然不敢悉其故 上謂直元亮不可赦宗憲既得旨乃密檄按察司收繫詔加憲太子太保餘皆遷賞有差然直雖就擒而三千人無所歸益恚恨謂我不足信撫之不復來日散掠浙東温台江北淮揚閩中嶺表為禍更慘○虜酋辛愛妾桃松寨來降辛愛俺答子士馬雄冠諸部且兇狡無賴北邊畏之其第三妾桃松寨與部目收令哥通辛愛欲殺收令哥令哥懼求降于總督宣大侍郎楊順順自謂為奇功以夷男婦致之闕下辛愛遣騎來索不得乃攻燬諸墩堡畧盡順懼上言虜情叵測欲協朝廷歸之未及決俺答子黃台吉黠虜也詐言以我叛人丘富易桃松寨巡撫大同都御史朱笈請從長計處以弭邊患于是遣

桃松寨收令哥等還辛愛召諸婦環視磔裂之虜知順無能竟不執送丘富而攻圍右衛益急○十二月朔金星晝見○戶科給事中徐浦請止軍門提編言浙直福建近因軍興額外提編以濟一時之急比多因公倍歛民不堪命今事勢稍息正宜休養而總督胡宗憲阮鶚乃於加徵存留之外仍前提編漫費無稽乞勅禁止疏下戶部尚書方鈍議覆既而浦復奏劾鈍昏庸依附胡宗憲阮鶚提編虐民呂希周侵牟軍帑皆事有指佐鈍兩可調停不堪重任可知不報然鶚浙中善後疏亦言提編宜罷察視總督皆以為恨及專撫福建獨罷閩中者○雲南左布政鮑道明獻寶石計一萬五千八百餘枚○原任工部尚書蔣璠卒贈太子太保謚恭靖璠歸安人端亮清平貌若恂恂而遇事有不可奪之節卒年九十○冬無雪時 上祈雪于雷殿諸祠踰月雪始降群臣表賀○詔止軍門納級時巡按直隸御史尚維持言頃因倭患許總督軍

門權宜納級奈何土豪市僧逃軍罷吏向懼罪自匿者皆得驕人于白  
晝大都而軍前未見協濟之實夫充軍下死罪一等而亦令納銀自贖  
罷閒官亦令效用軍門恣其削剝謂之何哉疏人 上罪各官任意行  
私令悉收回原發空頭劄付亟加禁止罷閒官生事害民者悉革回閒  
住○廣東總兵靖遠伯王瑾等討扶藜葵梅山峒賊平之先是賊首馮  
天恩李汝端等負險據巢招納亡叛流毒一方者數十年至是瑾等調  
兩廣漢達官軍分哨進勦斬首七千八百餘級破勦二百餘處所俘獲  
八百餘人地方以寧提督軍務侍郎王訪以聞詔廢瑾一子錦衣百戶  
訪一子國子生餘各賞賚有差○詔嚴捕妖人馬祖師先是有妖人馬  
祖師流寓湖州之烏鎮民沈松家以幻術惑眾有物如蝴蝶入人家變  
幻飛走異狀禦之則刀杖傷人夜魘魅惑人至死其黨有毛蓋計中江  
升高僊許逢李福松蔣明等更相誑飾鼓煽遠邇愚民為所誘脅甚眾

約以九月甲子起兵攻嘉興會有洩其謀者官司亟捕之毛崧等皆先  
被擒至期馬妖樹白青二旗放火縱掠兵備叅政劉燾急督兵擊之賊  
潰走南潯官兵追擊及於雙林盡殲其眾獨馬祖師者逸去總督胡宗  
憲等以聞兵部覆議兩浙倭患頻仍民生日蹙是以人心搖惑釁孽易  
生故妖道一鼓流言嚮風嘯聚今惡黨雖擒元兇未獲舟山逋逃反側  
觀釁宜急救脅從而嚴捕馬祖師者以除亂本詔可○以刑部侍郎潘  
恩為南京工部尚書○詔以冬寒暫停山東保定山西採礦召先差採  
辦主事張芹錦衣千戶張鉞還京時一歲先後所入各礦金銀玉旺峪  
銀七千五百兩保定金二十八兩銀九百二十八兩山東金八百五十  
二兩銀八千一百四十三兩河南銀一萬五百兩四川金七百兩銀一  
萬一千二百兩雲南金四百兩銀一萬兩

戊午嘉靖三十七年

春正月庚戌朔 上不御殿○光祿寺火奪少卿李鳳毛等俸下大官  
署正孫炤等於法司問黜為民 上諭司禮監曰寺火非天災自馬徙  
謙以來邪黨日多故示異耳○陝西民王金獻芝山一座金西安鄂縣  
人聚芝百八十一本內有徑一尺八寸者數本名曰仙應萬年芝山以  
祝聖壽 上悅賚以金幣○詔以天寒罷河南採礦召主事沈應乾千  
戶李鉉還 給事中張學顏請久任督撫非六年九年以上勿遷吏部  
覆言久任責成者所以重付託之權循資叙遷者所以廣疏通之法今  
部堂有缺必取諸卿貳卿貳有缺必推及督撫若督撫歲久不遷而資  
望淺者乃得躡陞啟僥倖速化之心失出入均勞之義非定論也第宜  
稍加督責令毋貽患地方耳詔如部議○二月賜嘉善公主薊州牧馬  
草場地二千五百九十五頃○命戶部督催廣東年例香料○倭犯廣  
東千戶魏岳高洪死之時倭犯潮州之鮑浦攻蓬州千戶所僉事萬仲

分部水陸兵馬東西哨攻之臨敵而哨兵皆潰領哨千戶魏岳高洪俱  
死○諭諭採木催科官務安靜行事時大工趨辦甚急民不堪命給事  
中魏元吉上疏言狀因請嚴差官騷擾之禁故有是命○虜圍大同右  
衛命發帑金應援時大同自納虜婦桃松寨之後虜圍困日急至者滋  
衆道路梗塞烽火斷絕總督楊順上書告急副總兵尚表護運入右衛  
虜復選銳圍之數重經月不解巡按御史路楷亦言右衛城中併竈而  
食折屋而爨勢甚倒懸危在旦夕 上聞而大駭命戶部發帑銀十萬  
兩亟遣才幹司屬督運濟之時度支告匱尚書方鈍等憂懼不知所出  
請令工部錢糧分其半還之本部以濟匱乏 上切責鈍等謀國不忠  
明日鈍謝罪請先發太倉銀五萬兩及紮荆關新城倉浮圖峪客兵米  
二萬石豆一萬石兼程運至大同以濟急用報可乃以郎中謝教督運  
大同○三月南陽地震有聲○詔逮繫宣大總督楊順巡按御史路楷

請京下獄削兵部尚書許論籍時兵科給事中吳時來劾奏順楷及論  
言順自蒞鎮以來所請帑銀無慮三十餘萬而該鎮兵食日見羸虛虜  
患猖獗城堡盡破未能出一奇發一策以効尺寸乃往往殺愚幼小民  
以報首功是驅塞下之民而歸之虜也即如桃松寨來降不過虜中一  
逋逃淫婦耳苟明於啟釁之媒拒之而弗納可也何乃貪為已功以誇  
示京師及聞虜酋來索文張皇敵勢恫喝朝廷故為兩難之說以自解  
既而輕墮虜計以丘富易而丘富卒不得不知順何以自解也乃行七  
千金賂巡按御史路楷楷遂藉口隱匿其事反以所殺邊民侈為順功  
楷驗首級既有灸疤網痕又多幼小偽狀甚明乃曰似亦屬真寧負朝  
廷而不忍負一順則朝廷餉邊之用祇供順等保身肥家之需耳兵部  
尚書許論虛名自負大言不慙與順比周隱蔽心實不忠宜各明正其  
罪以為人臣罔上之戒疏入 上問大學士嚴嵩嵩謂言官風聞不實

上曰時來之言不可盡謂風聞命遣官校逮繫順楷請東下錦衣獄  
獄具削籍為民論亦削籍○召起後楊博為兵部尚書 上思博忠勤  
乃自服中奪情召起之○改戶部尚書方純為南京戶部尚書以刑部  
尚書賈應亨為戶部尚書○遼東大饑人相食詔發太倉庫銀五萬兩  
補給軍餉○以兵部侍郎江東總督宣大軍務東至鎮視事奏聞 上  
報曰右衛久困朕聞城守將變爾急用心處置可兼左僉都御史尋論  
兵部曰右衛困急江東勿以權任辭務令盡心幹理逐賊入餉○詔逮  
繫巡撫福建都御史阮鶚詣京黜為民時御史宋儀望上言邇年舉用  
邊臣卒以奔競為通方僂譎為揮霍不一二歲輒計遷擢每有敗衄巧  
為掩蔽甚則求歸捆載而去如何棟之在劄遼周珙之任蘇松是已語  
及鶚久徵客兵驕秦民間至為十恨之謠宜罷斥未報時閩寇方張憲  
既奪舟山功恨鶚善後疏罷狼土兵盡撤回鶚兵鶚獨將自選五百人

入閩遇賊於福寧大戰於連江等處至福清至海口皆募土箸應敵以  
選鋒設奇破之然巡撫創建兵費稠亂鶚行戰立思心料手書募兵皆  
身饋食戰頗利宗憲乃乘間使世蕃風所私劾鶚剝民聚怨十罪鶚方  
督兵戰於海口就陣逮歸京師下鎮撫司訊治過不掩功罷為民○以  
協理京營戎政兵部右侍郎鄭曉為刑部尚書曉因上言故事在京軍  
民詞訟俱赴通政司告送法司問斷各衙門有應問者叅送法司不得  
自決比來事權不一諸司各自受詞不復叅送甚有私紙贖以為利者  
且其間拘禁捶楚或妄以意見出入顛倒法令致善良苦于紛拏奸頑  
喜於詐害請申明會典條例令內外諸司通行遵守 上納之○詔逮  
繫兵部侍郎吳嘉會于獄論削籍御史萬民英論劾嘉會巡撫薊州時  
侵牟築塞帑金 上命收繫既而獄具削籍為民○詔逮繫給事中吳  
時來主事張翀董傳策于獄論戍邊時吳時來等各上疏論劾大學士

嚴嵩納賂誤國狀時來言嵩輔政二十年引用匪人邊事日非邊臣剋  
剝軍餉以餽執事執事受其餉而典之合黨欺君令子世蕃入直票擬  
干與國政窺覘幾微以市恩私引其親萬案為文選郎中方祥為職方  
郎中比周為奸賄賂公行故俗呼案為文管家祥為武管家凡進退一  
人行止一事必關白世蕃不論人之賢否事之是非惟視賄之多寡如  
趙文華勦倭還京餽遺數萬猶以為未足而授草引疾張經被逮行金  
五千及聖斷不貸而詭為贖卹王汝孝失律以三千金而得遣戍蔡克  
廉撫淮揚亦以三千金而轉寺卿楊順欺君誤國何功可錄而三廢其  
子計前後行金三萬而方祥亦得二千吳加會修邊侵冒亦何功可錄  
而驟遷三官復三廕其子則以黃白厄彘五篋而趙文華為之閔通邊  
事不振軍民困窮職此之由翀言嵩位極人臣貲甲天下錄其子至工  
部侍郎孫至錦衣中書賓客盡登顯要親戚俱衣青紫古今以來可謂

極遇報恩當何如而乃恣行貪險大壞紀綱邊情之所以急儲餉之所  
以乏人才之所以下皆嵩所致且其險足以傾人其詐足以惑世其辯  
足以亂政其才足以濟惡使天下之人深畏其威而不敢言不可不急  
處以謝天下傳策亦言嵩奸貪諸狀急當罷斥以收人心時大學士徐  
階雅不與嵩同而時來翀皆階門生傳策又松江同鄉嵩大疑階密奏  
必有人使之者乃下時來等于鎮撫鞫訊備極苦楚竟無所言獄具擬  
坐重辟刑部尚書鄭曉執不可 上怒降中旨廷杖之謫戍嶺南嵩尋  
亦乞罷 上優詔不允○昌平州地震○夏四月詔進大同副總兵尚  
表為都督僉事初表以閒住官運餉入邊 上以表雖用而老不能出  
師遣薊州副總兵馬芳統所部家丁赴之其日表捷音至言官軍突圍  
典虜戰斬一人獲十八人內有俺荅一孫及一壻虜退舍十里 上加  
表功故令進秩○倭寇掠臨海縣時倭寇二十二艘約數千人掠臨海

之三石鎮總督胡宗憲驅走之○命兵部尚書楊博出督宣大軍務時  
大同右衛圍久不解議者以為非博往不可 上遂命博出督宣大虛  
部中位以待之令刑部尚書鄭曉攝兵部事○總督浙直侍郎胡宗憲  
獻白鹿時宗憲得白鹿於舟山獻之大學士嚴嵩等表賀○密雲地震  
有聲○詔削巡撫遼東都御史蘇志臯籍給事中張益論劾志臯貪污  
敗檢 上命削籍為民○詔發帑金協濟大同 上諭戶兵二部大同  
右衛久圍乏食即舉督餉大臣一人前往山西紮荆諸處糴米轉給仍  
徵薊州諸處兵馬赴援戶部尚書賈應春奏發帑金四十萬兩赴大同  
支用從之○裕王妃李氏薨 上親定喪儀如壽定王繼妃吳氏例以  
部疏錄薨失禮命改為故○大同右衛圍解先是虜分留右衛聞尚表  
運餉入城乃移大營內牧由是內外斷絕兵部尚書楊博奉命出督宣  
大徵諸鎮卒聲言伐虜羽檄日十數下總督侍郎江東等選集主客兵



數萬嚴部而進虜聞大兵至悉拔帳而遁東遂以是日入右衛城所運糧凡四千餘石居民感泣呼聲震地自以為更生初有倡言宣大可棄者上問大學士嚴嵩嵩設為難辭欲上自棄之上汲汲措餉發兵為更易文武大吏而虜尋引去右衛以存時守將尚表與虜相拒幾四閱月誓志勵眾死守不屈博上其功優叙之王德戰死奏為立祠贈廕詔加博太子太保兼左都御史既而御史桑尚約言右衛殘破以來耕稼廢於攻守田畝蹂於虜騎廬舍器具盡於炊爨農夫戰士夷于鋒鏑今雖暫解將來未可知宜大加賑恤嚴設守備為善後之計上深然之○五月大雩時久旱禾將立稿上命齋祀高玄忽雷電大作澍雨霑足群臣表賀○命留兵部尚書楊博於宣大鎮先是命博總督宣大事寧遠部及右衛圍解議召還博給事中張學顏上言宜假博事權令其專意綜理不必還部上以為然乃命博留鎮視事博請以進上

授邊縣以重邊防從之既而博因陳善後二十餘事于右衛東路牛心山諸處築大小土堡九座墩臺九十二座接連左衛高山站以達鎮城濬大河二道各長十八里五旬訖工請命御史視之上嘉其功大成速降勅加獎賚以銀幣○山西蒲州廣東潮州地震○倭攻福建惠安縣知縣林咸死之先是倭千餘攻惠安咸率丁壯乘城禦之倭攻五晝夜不克丁壯死者數百倭亦頗有損失乃引去咸復率兵攻倭於縣境之鴨山乘勝追奔陷賊伏中而死○浙江東陽縣地出血時東陽湖城張思齊家地折泐三四處各湧血若綫疑結片起大就食之掘地無所見巡按御史王本固總督侍郎胡宗憲各上其狀因言往歲慈谿曾有此異未幾有海寇之殃今諸寇未息而東陽復爾可為寒心乞勅大小臣工一体警備從之○福建倭結舟自海口出港叅將尹鳳督武舉楊承業等引舟師擊之衝沒賊舟七斬首六十八級生擒七人餘舟敗遁

鳳等追至東洛外洋及七礁白大淙諸處斬首百餘級生擒十六人銃傷及溺水死者甚衆福興倭患自是少熄○陝西淳化縣大雨雹○六月以宣大二鎮兵荒暫免居庸商稅○詔蠲大同被虜各州縣稅糧從總督尚書楊博奏也詔書至鎮軍民大喜博因宣布國恩選其丁壯之驍健者名為義勇使各路將領分隸教習兵威復振○召起原任巡撫大同僉都御史何恩巡撫南贛汀漳提督軍務時巡撫周滿以疾乞休上謂漳贛用兵之際滿病不勝任即當擇人代之于是擢江西布政宋淳代滿會淳為撫臣徐紳劾奏坐罷乃復起恩於家代之○癸工部節慎庫銀十萬兩於各邊修造軍器○秋七月詔奪總兵俞大猷等官初總督侍郎胡宗憲遣還毛海峯誘降王直及直至下獄海峯遂絕與倭目善妙等列柵舟山阻岑港而守官軍四面圍之雖頗有斬獲而賊憑高死守我兵莫利先登多陷沒者時新倭大至上屢降嚴旨趨宗

憲及時平賊宗憲懼得罪乃上疏侈言水陸戰功於是言官極言其欺誕并劾失事諸臣乃詔奪大猷及叅將戚繼光等職級期一月蕩平○巡撫雲南都御史王昺請罷鑄錢不從昺言雲南額派鑄錢三千三百一萬二千一百文以鹽課銀二萬兩為工費後物料艱難轉輸不便又加贖罰銀一萬一千兩止鑄錢二千八百七十四萬費多入少乞罷之部是昺議上以雲南產銅不宜惜小費以虧國用命給銀鑄錢如例○詔遣兵部郎中唐順之查理薊鎮兵馬○總督宣大尚書楊博言獨石孤危非憲臣駐之不可乞命分守口北道駐鎮城兼管東路而以分巡口北道專轄北路改駐赤城從之○閏七月命立承天府元祐宮紀成碑時御製碑文成乃命工勒石立之○淳化諸縣雨雹○汝王祐棹薨無嗣國除命保定侯梁繼璠迎王樞歸葬及其宮眷還京師○癸太僕馬一千匹給延固入衛邊兵○西苑獻嘉禾時西苑產嘉禾五本上

命薦於太廟群臣表賀○大朝門成時新建朝門午樓諸門成禮部請  
欽定名額 上命朝門且仍前權名大朝群臣表賀○總督浙直侍郎  
胡宗憲復得白鹿於齊雲山獻之○八月虜犯宣府赤城等處遊擊董  
一金等帥兵禦之斬首十二級奪馬百匹把總馮尚才戰死○兵科給  
事中鄭茂疏陳邊務條上八事曰審兵械慎選用勤巡歷明戰守攻火  
器清耗蠹申禁例恤凋殘章下所司覆行○詔錄曾子裔孫質粹為世  
襲翰林五經博士質粹曾子五十九代孫也○九月冊陳氏為裕王繼  
妃妃監生陳景行女也選為裕王繼妃至是冊之是為仁聖皇太后○  
詔停吏農監生及武官加納事例○虜寇遼東時大虜王文土蛮黑石  
岩諸部十餘万眾駐大醴場以精兵七千騎寇界嶺坎垣將上叅將崔  
桐擊走之又寇箭捍嶺總兵佟登拒之又合眾寇嶺西諸塞總兵歐陽  
安馬芳等擊走之其奇兵入黑峪嶺中軍張倫等破走之乃拔營遁去

○擢翰林院待詔尹樂舜鄭守德潘靜深李秀為禮部主事仍兼原職  
給事二王府○兵部郎中唐順之還京先是順之奉命閱視薊鎮軍馬  
至是還奏薊鎮額卒減少三萬餘人且一卒未練仍以徵發疲各邊因  
上言昔漢光武以漁陽突騎定天下唐藩鎮專兵而盧龍一道常虎視  
河北所謂其人慷慨勇悍而沉鷺即今薊鎮之兵也今皆羸兵敗馬朽  
甲鈍戈徒靡廩餉不濟緩急故往年庚戌之變及近日土墻之寇至於  
近檄宣遼遠徵延固以禦之乃鎮兵則置而不理誰之咎也所據總督  
王忬總兵歐陽安巡撫馬佩等俱宜坐曠職誤事之罰 上降旨曰該  
鎮缺兵至三萬不補一卒不練督撫所理何事兵部從實叅看以聞于  
是攝兵部主事駭等議三臣俱當降罰時琬已罷去乃命降忬安祿都  
級留用○冬十月命太子太保魏國公徐鵬舉守備南京兼掌中軍預  
督府事○陝西華州地震有聲如雷越六日再震十二日復大震傾廬

舍甚多○議練邊卒自庚戌後虜患日迫諸鎮兵不支每歲徵客兵為  
援而客兵苦徵發為費復不貲日就耗散當事者建議各練本鎮戍卒  
省徵發費十之六七 上從之勅各鎮遵行然戍卒多異悞不任戰歲  
練亦費萬金而臨事徵發如故○總督浙直侍郎胡宗憲請辭功賞不  
許時岑港倭寇巢柯梅宗憲屢督兵討之不能克南京御史李瑚乃追  
劾宗憲私誘王直啟釁巡按浙江御史王本固南京給事中劉堯誨亦  
劾其老師縱寇濫叨功賞請行追奪宗憲自辯 上曰卿計獲妖賊人  
所共知特以獻瑞故人即引軍事害卿耳卿宜竭誠展布以平餘氛不  
允所辭因命兵部郎中唐順之往浙直視師與宗憲協謀勦賊○詔治  
薊鎮侵冒軍糧諸奸先是 上問戶部尚書賈應春以薊鎮兵糧之數  
應春以不知對 上責之曰是兵數已經查明五萬九千二十二名爾  
部自有各邊奏報文冊何謂不知應春乃檄薊密昌平管糧官將三十

年已後見在食糧軍數一一查覈盡得詭名冒支諸奸弊狀上之詔下  
按臣訊治○淮揚巡撫都御史李遂疏獻泗水神木言鳳陽府五河縣  
有大杉一株圍一丈五尺長六丈六尺湧出泗水沙中臣等竊惟中都  
祖陵所在此木忽現謂由河而下原非所出之區謂從江淮而入又無  
逆流之理是蓋祖宗啟祐淮泗效靈與大工會不偶然也昔成祖重修  
三殿有巨木出於盧溝因以神木名殿二百年来美談再續臣謹拜手  
以獻 上令即輦送至京以助鼎建○十一月詔逮繫巡撫應天都御  
史趙忻松江府同知劉敏政吳江知縣曹一麟至京訊治先是忻行部  
至松江會金山軍亂鼓譟露刃直抵松江城下久之方解時崇明戍軍  
亦以索餉不獲縛海防同知周魯署印判官薛仕囚之教場數日給事  
中蘇景和聞之乃上疏劾忻淫酗貪墨各賞檄變狀因言敏政一麟皆  
忻所屬吏三人相與濟惡殃民疏入 上怒命逮繫訊鞫法司言忻等

皆以催徵過刻行事乖方致招物議未有貪縱實跡乃命降斫敏政調用一麟為民○詔以雹災免山西平陽太原二府夏稅有差○詔諭法司恤刑上敕諭三法司曰朕承天命為天下生民主因念人命至重惓惓矜恤刑以弼治當則可致協氣休祥自至否則上于和氣災沴攸生近來司民牧者理道不明律法不通任事作威深文鍛獄甚或貪賄聽囑顛倒是非不顧冤抑是何心歟且湖廣安陸縣勾男兵一魁二命枉刑毋又被拘情無所告遠至朝扉以一推之豈止數百爾三法司治刑為職當思矜恤都察院通行天下撫按申飭有司各改前愆惟公惟慎盡心聽讞民以不寃天地神明昭鑒在上爾亦能保祿位福子孫如不恭命必不爾逭欽哉○十二月初命歲遣御史查光祿寺錢穀時光祿寺歲用以三十六萬計上以為多疑有乾沒仍諭內閣曰即今兩宮大分盡省妃嬪僅十餘宮中罷宴二十年餘朕所用膳品悉下料無

堪御者十壇供器不當一次茶飯費朕不省此三十餘萬安所用也大學士嚴嵩曰臣聞祖宗時每歲額銀二十四萬兩彼時該寺歲用不過十二三萬節年積有餘銀今乃三十六萬其侵欺情弊可知臣查會典光祿寺內一款凡本寺供應物件月差御史照刷具奏若復會典舊規則諸弊可革上從之命遣御史一員月籍該寺諸費進覽自是歲以為常而經費亦為稍損○巡撫延綏右僉都御史董威為報効義勇官趙鶚并家丁趙昇等奏求火器工部覆請上謂鶚既稱報効不自備器械而官為請給顯是假托冒功不許○給事中魏元吉等疏救荒四策一補積欠請令通倉收粟以給薊鎮薊鎮發銀以給遼東彼此完補各從水陸之便一革濫稅請疏通山海關往來商貨罷勿復征一闢礦禁請召集各處礦夫聽其從便採銀以四分輸官備賑濟之用一議引銀每引請量減舊值止稅銀二兩發管糧郎中補給軍士草價部議允

行○總督宣大山西楊博請築大同邊牆言大同防秋稍暇宜大築邊牆以為經久治安之計約當用銀二十九萬半取於本鎮半給以內帑乞下所司詳議兵部覆言大同自併墩之說興而三邊之斥堠漸踈築塞外之防廢而右衛之藩離不固遂至胡馬長驅憑陵近郊前事之不遠後事之鑒也博所請工鉅費少誠救邊遠圖宜發太倉銀十萬五千兩太僕銀三萬五千兩聽其隨宜經畧工完之日俱籍以聞報可

已未嘉靖三十八年

春正月癸酉朔上不御殿○巡按直隸御史尚維持請設四城守禦不從維持上言吳淞柘林川沙陽舍孟河五處俱為蘇松常鎮要害吳淞舊有守禦所而四城未設專官乞各鑄給千戶所印及註選倉大使一員以司糧餉蘇松叅將宜駐金山督守柘林青村南匯川沙諸處常鎮叅將宜駐陽舍督守圖山孟河二地而浙直總兵專駐吳松調遣事

下兵部議覆言各將改駐當如所奏其四城設守禦所必須改調官軍抽補軍士坐派月糧計畫允當方可議行上從部議○前軍都督府

火詔奪掌府事英國公張溶等祿米五月巡風百戶姚瑞下法司逮問

○廣東原屯黃岡倭流劫海陽饒平湖陽惠來等縣○詔賜大學士嚴

嵩苑直出入乘肩輿歲支伯爵祿及銀幣羊酒仍宴於禮部先是大學

士徐階等言嵩年登八十本朝閣臣實未嘗有請加優禮故有是賜嵩

疏辭伯祿部宴上復溫詔答之○總督胡宗憲請募山東民兵言倭

患未弭春汛伊迺請募山東民兵三千選官督駐蘇松常鎮防守部議

從之○詔祔享瑞州知府宋以方於旌忠祠先是正德中副使周憲以

討瑪瑙賊被害建旌忠祠祀之及宸濠之叛以方死之至是以方孫一

范請祔享於旌忠祠上許之○二月虜寇遼東時虜犯遼東塞總督

侍郎王忬檄部將楊照帥師禦之照分布諸將及虜大戰逐北數十里

斬首虜八百餘馬牛夷器以千計忬以大捷聞故事首虜四百即稱大捷為上功大學士嚴嵩時啣忬竟阨其功不錄○會試天下貢士命吏部侍郎兼學士李璣太常少卿兼學士嚴訥為考試官取蔡茂春等三百二十人○巡撫河南都御史章煥請遣部臣經畧河工不許煥言汴城以河為帶其初河徙西來勢本東注數十年間南岸傾頽北岸淤塞漸成橫溢宜於翟家口大開河口以殺其勢別挑支河培築堤岸以圖求遠請遣部臣經畧詔行其議而勿遣部臣○命海州備倭指揮韓懋功移駐西平堡兼轄海蓋二衛以西平通隣虜巢屯堡單薄徙鎮撫等官請也○大學士嚴嵩請裁入直諸臣酒饌從之嵩上言昨詔遣御史閱覈光祿錢穀二月間遂省二萬一千有奇今在直諸臣酒饌日費二金乞寢之 上曰法行自近日裁三之二○總督宣大尚書楊博請錄招降功從之博言宣大三鎮一歲中招降至千六百四十人乞錄諸將

佐功 上命賞賚有差○虜入薊州塞詔逮繫總兵官歐陽安等下獄論死自練兵議起薊鎮客兵減什之二而春防視秋又殺什之五以故鎮兵最為單弱是時虜酋把都兒辛愛率數萬騎以朵顏酋影克哈孩為鄉導入寇總督王忬所遣偵謀皆被殺死遂薄塞下忬疏請援兵大學士嚴嵩謂忬挾虜為重欲坐費帑金不報適涿水暴淺虜遂由潘家口入塞大掠薊州諸處忬遣總兵馬芳等以輕兵八千夜馳虜後牽引之虜不敢深入三日引去事聞 上以薊州失律逮安等下獄而奪忬俸使砥礪為秋防計既而言官復言安等當服重典乃論死長繫獄中○總督南京糧儲戶部右侍郎黃懋官條陳錢糧事宜言各衛官軍馬匹開支糧料如有逃亡事故倒失者宜計日扣還不得仍前案候以長奸弊一軍匠日支口糧如遇小月即除一日不得五年類叩以恣侵匿長安四門軍人口糧仍行原委司屬親詣給散不得輒委官攢以致踈

通部議從之○廣東倭流劫福詔安官兵禦之賊引眾犯漳浦○詔襲封衍聖公孔尚賢送監讀書時山東撫按官丁以忠等言尚賢冲年寡學宜查照伊祖孔弘泰比擬公侯伯事例送監讀書詔從之○三月詔請巡撫大同都御史朱笈戍邊初宣大總督楊順巡按路楷宣府巡撫張鎬朋比為奸獨笈不與私黨及桃松寨歸笈復詆順不置順譖之於大學士嚴嵩乃以右衛圍急斥免比順楷被逮給事中鄭茂往勘詞連笈乃亦逮訊以順罪坐之遂令戍邊○廷試賜丁士美毛惇元林士章等進士及第出身有差○倭犯浙西自象山縣金井等處焚舟登岸海道副使譚綸引兵與賊戰於馬岡敗之斬首七十七級○鳳陽巡撫都御史李遂等請留入衛班軍不許遂等言淮陽鳳泗東南重地武備久弛近者倭夷突入乃暫留京操春班官軍以為防禦但兵非恒役必無固志將非專設終難責成乞定議存留班軍專勅副留守等分領操練

抵護陵寢兵部言入衛官軍輪班歇操原係舊制若留春班則秋班每歲京操有礙事体宜將皇陵衛官軍編立甲伍令加操演專一護陵不許別調其春秋二班軍番休者遇警候軍門調遣報可○詔逮繫浙直總兵俞大猷訊治先是柯梅倭流泊泉州浯嶼焚掠相拒者一年所後諸酋移眾南嶼建屋而居閩中大詳謂總督胡宗憲縱寇往宗憲乃上言舟山餘孽勢易成擒而總兵俞大猷邀擊不力縱之南奔閩廣宜加重治上命逮大猷訊治閩人復大噪謂宗憲嫁禍大猷於是南京御史李瑚論劾宗憲數其三大罪瑚與大猷俱閩人宗憲疑有漏言遂委罪大猷以自掩飾○上禱雨於雷宮禁屠停刑既而雨百官表賀○倭犯江南崇明縣泊舟三沙地方登岸焚劫○夏四月山西卒亂都督輝鄭印討平之時山西叅將高鵬有廝養卒八百人馭無術諸卒謀叛殺鵬及遊擊將軍畢文焚府縣廬廨劫囚掠帑一郡大亂印乃督兵



討之群寇遁散○裕王長子薨大學士嚴嵩等言親王之子曰世子今  
若稱長子是與郡王之子同也乞特賜追封庶於典禮為合 上命追  
封為世子其葬祭視世子已封者例○福建新倭大至且多竇攻具先  
攻福寧城經旬不克乃移攻福安縣破之其沿海諸郡邑若長樂福清  
等境悉有倭舟是時廣東流倭往來詔安漳浦閩浙江前歲舟山倭移  
舟南來者尚屯浯嶼加之新寇徧福漳泉無地非倭矣○巡撫貴州都  
御史高翀討普安亂軍平之初普安衛安南所屯軍李昂等聚眾行劫  
拒捕殺人流毒川貴者且七年至是昂等渠魁九人就擒翀等以聞及  
稱貴州軍民鮮少多係川湖流民生事宜申明保甲以稽土著 上嘉  
翀功賜銀幣昂等依律處決餘允行之○倭寇掠淮揚巡撫都御史李  
遂擒獲之時江北兵備劉景韶以遊擊立陞等擊原駐白蒲倭一戰于  
丁堰再戰於如阜東三戰於海安皆捷斬首百餘級賊乃進掠通州如

舉謀犯楊州景韶復督陞等擊敗之賊奔入潘家庄盡銳攻之斬獲甚  
多既而廟灣倭又合眾來攻淮安叅將曹克新禦之賊敗溺死者其眾  
巡撫李遂以禦倭功次上聞前後斬獲真從倭首八百一十八級生擒  
一十六人 上嘉遂督兵臨陣斬獲數多命按臣覈實議賞○詔發倭  
僧清授于四川寺院安置初清授隨侍郎楊宜所遣鄭授臣至寧波未  
幾總督胡宗憲所遣生員蔣洲復以僧德陽至俱上書求貢市朝議未  
允令量賞遣歸未行而王直就擒宗憲疏言倭情可見不必遣還然留  
之浙西非宜請用洪武間例發四川各寺安插兵部議從之○擢唐順  
之為右通政先是順之以職方郎中命視師浙直至是總督侍郎胡宗  
憲薦其有文武才宜超格用之時順之已進右通政仍命同宗憲經畫  
軍政○五月倭寇福清諸縣時倭犯福清晉江諸縣焚掠慘甚巡按福  
建御史樊獻科奏劾巡撫都御史王詢叅將黎鵬失律罪詔奪祿抵罪

有差。○詔逮繫總督薊州侍郎王忬，拷訊論死。初，楊繼盛劾大學士嚴嵩為所陷死，忬聞之，悼甚。而二子又為經紀其喪，嵩卿之，常思有以中忬。及詔各鎮練卒，忬意實以鎮卒不任戰，雖練無益，而諸隘迫虜，不得不徵發，以為固然，不敢辯。而疏上練兵十三事，曰：請以三年為期，嵩喜曰：何昔畧而今詳也！且彼尚欲三年，耶及灤河之役，嵩擬旨當重置罪，始奪祿責後，劾復，嗾言官劾總兵俞大猷等論死，欲以搖忬。而都御史鄆懋卿復給忬曰：政府以邊事重，不欲困君行，且縱君歸矣。蓋自投劾去，忬信之，果請放歸。懋卿復為草授巡按直隸御史方輅，曰：政府欲逐王忬，而忬復自請歸，君盍劾忬兩遂之，輅亦信懋卿。乃上言：忬病，忬不任事，調度無策，貽害地方，失策者三，可罪者四。負主上恩，當罷嵩，得輅疏，即擬旨逮繫忬。上從之，乃遣官校械忬至京，下錦衣獄。拷訊獄具，世蕃復削去所叙功次，上之下刑部論罪。尚書鄭曉惜忬持不從，重擬

謫戍，奏入。上降旨曰：軍令指揮之誤，諸將皆斬，令從重擬罪。乃比守邊將帥守備不嚴，失陷城寨，律斬。長繫待報。○詔改宣大總督兵部尚書楊博總督薊遼軍務，初博在宣大有酋字素雄，塞外屢肆侵擾，博計擒之，斬其黨十有五人。時出奇兵襲虜，虜徙帳去，乃列上修邊四事，費半功倍。上嘉之，至是王忬罪繫，乃移博總督薊遼。時方盛夏，博聞命即赴鎮，區畫戰守事宜，虜聞楊總督至，悉引去。博以朶顏等屬夷每通虜，不為我用，乃約束諸帥同時舉燧，燧揚旄，燄自居庸至山海，瀰漫千餘里，旌旗連天，礮石震山谷。如是者三，屬夷牒報虜虜大震，叠以為我兵頓增益，連駁為堅，終歲不敢近塞下。○副總兵盧鏜破倭寇于崇明沙，先是俞大猷被逮，命盧鏜代之。時倭寇二十餘艘屯崇明，沙總督胡宗憲檄鏜帥師攻破之，寇遂遁去。○詔更建玄聖五龍亭。○江北兵備，李景韶擊廟灣倭，平之時廟灣被倭圍日久，景韶督卒填壕塹，嚴兵逼

壘而陣賊終不出乃令水兵載葦焚其舟復水陸進擊倭潛遁入舟官  
 兵進據其巢追奔至瑕子港斬獲頗多餘倭無幾不復能戰乘風開洋  
 而去○福建永福倭舟出梅花洋參將尹鳳等以舟師分擊之斬百餘  
 級生擒九人既而倭復回舟泊澳頭未幾復遁鳳復以水兵追擊於橫  
 山斬獲甚眾○六月京師大霖雨 上諭司禮監祈晴雷殿禁屠停刑  
 ○以陶世恩為太常寺丞世恩仲文子以廕歷尚寶少卿為言官所劾  
 奪其官仲文乃乞復原職 上命改為太常寺丞兼道錄司右演法○  
 召南京戶部尚書馬坤為戶部尚書時賈應春以疾乞致仕故召坤代  
 之○詔遣官存問秉一真人恭誠伯陶仲文時仲文請假暫還里中  
 上諭禮部曰仲文職掌玄教屢盡忠誠雖請假還鄉年逾八旬即書勅  
 遣錦衣千戶前去存問賜以金幣羊酒用示眷懷仍令有司歲時存問  
 ○虜犯宣大時虜由大同鎮川堡入犯轉掠宣府東西二城駐內地凡

旬日會久雨乃分道西自趙山溝墩東自丁零嶺懷安左右衛引去總  
 督尚書楊博因條上經畧宣大八事悉允行之○雷擊奉先殿門外南  
 牆西墻○秋七月初命太倉銀庫月報出納之數戶科給事中龔情言  
 奉命巡視太倉銀庫正月內貯銀七十四萬有奇未及半年僅餘八千  
 餘兩國儲至此可為寒心昔皇上一問光祿經費月具揭報歲省三分  
 之一况太倉歲以千萬計中間請乞之頻仍給予之汎濫當不止如光  
 祿所侵冒者亦令月具內外出入之數自當畏懼樽節而所省不貲詔  
 可太倉銀庫之月報出納自此始○總督薊遼保定尚書楊博疏陳邊  
 務言薊遼二鎮唇齒相依每秋彼此警報緩急互異宜令遼東總兵楊  
 照於七月以後統領勁兵移駐前屯一帶一遇石門燕河二區有警徑  
 自入關應援至于灤西黃花一帶極當虜衝昌平居庸所係尤重仍當  
 嚴行宣府總兵李賢亦於秋期移駐懷隆如遇灤西有警馳入居庸會

合薊兵併入勦截疏入報可○金星書見○南京禮部尚書閔如霖卒如霖烏程人恭謹有文以撰玄失 上意南遷尋罷鬱鬱而卒○南京地震有聲○詔賜潘世子程堯書籍敬一箴皇明祖訓祖德詩恩紀念春堂詩四書大全大學衍義各一部從潘王恬爇請也○倭寇犯江北叅將丘陞死之原屯三沙倭賊突犯江北由海門縣七星港登岸流劫過金沙西亭將犯揚州海道副使劉景韶督陞等兵併力禦之戰於鄧家庄賊敗走仲家園復追至鍋團陞輕騎先追賊覘無後繼盡銳來衝陞馬蹶被殺已而官軍大至賊懼奔遯○八月巡撫鳳陽僉都御史李遂獻白兔二禮部請遣官告廟百官於大明門稱賀 上命成國公朱希忠告太廟百官免賀○山西山丹衛天鼓鳴○總督胡宗憲遣江南副總兵劉顯破江北倭於劉家庄敗走之初江北倭自鄧庄敗後沿海覓舟不得官兵自後急擊之於劉家橋諸處賊勞餒困頓會天雨乃奔

入劉家庄官兵四面圍之宗憲遣劉顯以銳卒千餘來援江北將士謂功在垂成慮為顯所撓嘖嘖有言巡撫都御史李遂恐士卒不和乃檄江北兵悉屬之顯軍政既一遂刻期進兵顯率所部先登各營選鋒繼進縱火衝擊自辰至酉賊巢始破奔走追擊之先後斬首四百餘級賊衆盡殄○詔發太倉銀遣官賑濟遼東巡撫都御史侯汝諒言遼左全鎮被災三歲不登乞如大同右衛例簡命大臣大出內帑金錢以拯此一鎮生靈阽危之命 上聞而憫之故有是詔○原任刑部尚書何鰲卒贈太子少保鰲山陰人清正直諫有古大臣風士論重之○九月兩淮巡鹽御史李廷龍請賑濟竈戶言兩淮三十場分災傷異常應賑貧竈共六萬五千六百餘丁乞支庫貯挑河銀一萬九千餘兩酌量賑濟從之○暹羅國王勃畧坤息利充池呀遣使貢方物賜賚如例仍從其請還抽分貨物以佐修船之費併給來使冠帶○刑部尚書劉訥卒訥

鄆陵人故尚書璟子武廟南幸訖以寧國推官署蕪湖縣中貴索饋不與繫獄罷官嘉靖初起廢尋遷御史累進刑部尚書毅然守正不少撓法士論服之○總督薊遼尚書楊博請借通倉運糧以給遼東從之博上言遼東災傷已極召糴甚艱乞將新運通倉錢糧停泊天津者暫借六七萬石出天津水運薊州以達山海關顧脚陸運至各地方給散其漕糧則以賑濟銀兩糴還戶部議許之○冬十月廣東寇作亂廣東寇張璉林朝暉吳平龍何福溫旦等烏合千餘人流劫朝陽及海豐諸處拒殺官兵土官不能制以狀上聞○原任工部侍郎程文德卒文德永康人篤學脩行稱為儒者命撰玄文不稱旨疏勸上享安靜和平之福上怒令削籍及卒貧無以殮識者躉之後贈禮部尚書謚文恭○詔增設廣東廣寧縣隸肇慶府先是提督兩廣都御史王訪巡按御史潘季馴等言邇者扶黎諸巢實四方亡命淵藪蓋由山峒深僻奸盜易

匿致然請於團浦地方開設縣治分割四會縣太平柑攬大團等地方十一團隸之報可○山東沂州地震○總督浙福侍郎胡宗憲乞解職不許先是巡按浙江御史王本固南京御史李珣各論劾宗憲岑港養寇溫台失事掩敗餘功之罪詔下查盤科道官羅嘉賓龐尚鵬從實覈報嘉賓等復奏其不職宗憲乃引疾乞解任優詔慰留之○詔以瑞雪及秋祥疊降法司停今歲行刑○十一月詔以宋儒朱熹原籍婺源縣子孫世襲五經博士熹婺源人後宦建安遂家焉國朝官其子孫為五經博士世襲建安而婺源子孫請如建安例乃以朱暨為五經博士而未有世襲至是野老請授其子鎬世襲許之○蘇州諸惡少作亂蘇州自海寇興招集武勇市井惡少咸奮腕稱雄十百成群誑詐剽劫白晝橫行市人莫敢正視巡撫都御史翁大立檄捕之諸惡少懼相與插血以白巾抹額各持長刃巨斧攻吳縣長洲縣及蘇州衛獄劫囚自隨鼓

噪攻都察院門入之大立挾妻子踰墻遁乃縱火焚衙廨勅諭符驗令  
字旗牌一時俱燬會天將曙諸惡乃衝封門斬關而出逃入太湖中官  
兵四散探捕獲首從周二等二十餘人事聞 上命大立戴罪尅期殄  
滅以靖地方奪知府王道行知縣杯東伯等俸捕賊指揮朱文正等按  
臣逮問○詔改陝西渭南醴泉隆德沂陽石泉沔縣漢陰七縣徑隸各  
府七縣皆州屬以撫按官言其不便改之○總督陝西三邊侍郎魏謙  
吉疏陳甘肅防禦事宜言甘肅三面臨戎中間一線之路地既孤懸而  
尺籍半虛兵馬單弱即合番夷侵軼大虜盤據增兵實伍已無餘策請  
將各鎮城堡逐一審驗凡年力壯健無他役占者悉編之伍籍一體防  
禦能立奇功酌量陞賞部議允行○四川小河守禦千戶所地震有聲  
○詔誅海賊王直梟示時總督胡宗憲讞上王直葉宗滿王汝賢等獄  
謂直等勾引倭夷肆行政掠東南絳騷海宇震動臣等用間遣謀始能

誘獲乞將直明正典刑以懲于後宗滿汝賢雖罪不赦然徃復歸順曾  
立戰功姑貫一死以開來者自新之路法司議言三犯俱不可原 上  
曰直背華勾夷罪逆深重命就彼梟示宗滿汝賢既稱歸順報効姑待  
以不死永遠戍邊○原任大學士削籍翟鑾卒子汝忠陳乞復秩 上  
念其贊襄有勞許復故職○召總督薊遼兵部尚書楊博還部先是博  
自宣大撫薊遼防秋畢當還部吏部尚書吳鵬曰宣大重鎮非博不可  
刑部尚書鄭曉曰博在宣大則宣大安在本兵則九邊安乃召還理部  
事尋加少保○召起原任兵部尚書許論總督薊遼軍務時博還部故  
召論代之○十二月詔贈蘇松兵備右叅政任環為光祿寺卿立祠廕  
子環前為蘇州府同知倭寇犯蘇之閩門城門閉民避寇者不得入統  
城號泣環按劔開門納之全活萬計蘇人德之屢擊倭寇有功累進叅  
政矢志滅倭衣服皆自織其名誓必死賊後以母喪歸遂卒于家禮科

給事中徐師魯上其事請贈祀。上命贈光祿卿有司建祠蘇州以時致祭仍任一子原衛副千戶。○巡按浙江御史凌儒請賑恤竈丁從之。儒言浙東杜賣長亭等八場竈丁近遭倭患焚蕩殺虜傷殘已極乞將運司沙地銀五百七十餘兩在倉稻穀七千六百七十餘石量行賑恤。戶部議覆報可。○詔錄宋儒程頤二十代孫宗益世襲五經博士。○以陝西苑馬少卿張祥為按察副使整飭洮岷邊備祥在苑馬濬蠱鏹奸諸邊利賴進副使通融茶法剪刈牟食番人一二皆震駭無敢撓法者。○詔遣還浙福諸處募兵收為鄉兵。巡按福建御史樊獻祥言近歲軍興募集武勇四方無賴子每以投兵報効為名所至騷擾今廣浙閩俱有海警宜以三省兵應募者悉遣還原籍收為鄉兵即以客兵糧餉養贍不惟客兵免遠調之勞各方且獲鄉兵之利計無便于此者。上令行之。○詔開天津海道先是巡撫遼東都御史侯汝諒以遼東大饑議

開山東之登萊北直之天津二海道轉粟入遼陽戶部議復言天津海道路近而事便當如擬行其登萊海道慎勿輕議以啟後患從之。

**庚申**嘉靖三十九年

春正月丁卯朔。上不御殿。○以都御史鄔懋卿總理天下鹽運初戶部奉諭計處財用擬遣主事一人詣淮浙理鹽課得旨報允乃以主事黃乾行名上。上曰鹽法久弛非極力整頓不可其更議以聞戶部請如先年遣取九疇王瓊黃臣等例改命大臣一人往理吏部乃舉懋卿懋卿大學士嚴嵩鄉人也倚借嵩勢開通苞苴殆無虛日故事諸府縣巡檢司邏卒責捕盜縱脫遺漏者罪之不尅以次懋卿乃奏立尅限法每卒一人季限獲鹽若干斤販夫若干名舟若干艘其有舟無販夫有鹽無舟及有販夫無舟鹽者不錄為次其鹽與販夫不及若干數亦不錄俱削其雇役錢存帑以充舟鹽之值故邏卒遇無私販有終歲不

得支一雇錢者而身羈役籍不遑為生產往往共行私販牟大利遇商  
舶旅舟反誣為盜盜按劫之少拂意輒以私鹽強頓舟中誣其人為販  
夫白致刑獄至有死亡者害不可言其有司又或增賦於民徵金作舟  
鹽之值不復責邏卒以緝捕而私鹽任其橫行貽患至今鹽法大壞既  
而南京御史林潤劾奏懋卿貪冒五罪言需索屬官餽遺鉅萬罪一受  
狀取富民財罪二宴會日費千金罪三害殺平民罪四加派揚州鹽商  
幾至激變罪五懋卿疏辯 上不之問○擢唐順之為僉都御史巡撫  
淮揚先是順之以右通政浙直視師至是擢令巡撫淮揚順之因條上  
海防事宜八事一曰禦海洋言禦倭上策必禦于海而崇明舟山乃海  
賊入寇之路尤宜預防當春汛時宜令蘇松兵備暫駐崇明寧紹兵備  
暫住舟山總副將官常居海中督兵分哨如有縱賊入港登岸者以次  
論罪二曰固海岸言賊至如不能禦于海則海岸之守為第二着昔但

坐地方殘破者之罪今宜併坐賊所從入者有能衝鋒禦賊使不得登  
岸深入者雖無首級亦以奇功陞賞三曰圖海外沿海逋逃之徒為賊  
嚮道者甚眾宜多方招徠以消禍本并開日本通貢之徒若抄犯如故  
則命朝鮮琉球承制宣諭四曰定軍制言調募客兵坐靡廩餉宜急練  
士着之兵俟訓練成悉罷調募五曰鼓軍氣言士卒遇海風而頭目掉  
眩聞潮聲而耳聾心惕何望掃清大懟宜責文臣督帥時御戎服出入  
軍中以作武將之氣武將臨陣時聞取潰校逃卒斬一二人以變士卒  
耳目六曰復舊制言沿海衛所軍伍素整屯田數萬悉可墾種七省原  
設三市舶司收權于上今數者俱已廢壞宜令諸路酌時修舉七曰別  
人才言海道副使譚綸總兵盧鏜等可舉而台州知府黃大節副總兵  
曹克新等宜罷八曰定廟謨言外患未息內變恐作近者吳松定海水  
卒以呼糧之故縛官劫獄漸不可長宜預議招懷之畧疏入下附司議



行之因罷大節而調克新別用○陝西寧夏衛地震○虜犯宣府虜入  
寇洗馬林諸堡副總兵馬芳督兵拒却之巡按御史王汝正以聞因請  
治芳與叅將郭震等縱賊入境之罪詔芳以功准贖震等俱下御史問  
○金星晝見三日○盜劫泰興縣庫時盜百餘人夜入揚州府泰興縣  
劫庫殺人守臣以聞詔奪知縣梁棟等俸及把總呂珩各戴罪捕賊初  
江南禦倭水兵多浙中少年烏合應募之輩及事寧散還窮無所歸流  
落江湖間遂相聚為盜云○二月詔更定浙東守巡官信地以台金嚴  
為一道改分巡寧紹僉事為台州分巡兼管三府兵備添設叅將一員  
守之以寧紹為一道其原設寧紹台兵備副使及叅將俱令止領寧紹  
二府以溫處衢為一道其原設溫處兵備分巡副使令兼領衢州一府  
仍以寧紹分巡事併于兵備道從總督胡宗憲議也○脩理都城興工  
○詔殺原任中允郭希顏于江西市初希顏由中允出為兩浙鹽運副

使大計復削籍家居十餘年至是上疏言臣外一歲恭讀聖諭欲建帝立  
儲者臣謂立儲難如欲立諸則重臣莫可與言有莫若安儲何者君相  
相信則儲安兄弟相保則信安父子相體則儲女相信有道釋疑是也  
相保有道分封是也相體有道總攬是也三者女儲之急務也何謂釋  
疑臣惟蒙無故之議者仁君不及全其臣屢危疑之地者慈父不能庇  
其子皇上至愛莫如二王至重莫如元輔固何嫌何疑自言者倡為二  
王面陳嵩惡之說恐輔臣疑而不自安則何暇善後然尚可諉也由差  
遠也二王疑而不自安則誰與承祧此大可慮也由最近也皇上何不  
降德音諭元輔以益加忠謹使知王初無他也不必疑王諭二王以無  
忘恭敬使知嵩亦無他也不必疑嵩然後王心無所惶惑而師保是依  
大臣無所避忌而匡贊愈力臣故曰疑釋而君相相信則儲可得而安  
也何謂分封臣聞神龍離洲人或狎之美玉出匱人或伺之言外防也

二王親則皇上之子也貴則國本之寄也顧同處京府智與年長則崇高所共欲防不預設則詭隙所由萌故幼而躋就膝下者所以篤恩也長而出就藩封者所以強本也宮府不宜久虛山川若已預待大臣畫計聖明早斷及時勅王就國周其翼衛殊其寵數於制於情似為兩盡故曰分封而兄弟相保則儲可得而安也何謂總攬臣惟恒情愛子未有不身任其艱而欲子安於無事者今四郊多壘一日萬幾非皇上神謨獨運太平未可易致天意人心孰不欲大聖人萬年垂拱者即京府獨處猶宜親就儒賢涵養冲質切礪於仁孝之道而一毫外務不得預聞况時事固非高枕之日而君父又非倦勤之年分封之典既定留京之意已明即皇上端拱以應天人從容而議建立似無不可故曰總攬而父子相體則儲可得而安也此三者安儲之至計而今日之先務也臣每嘆忠臣不退耕而忘君烈士不避戮以直諫在廷不遠在野不容不言惟聖明赦草茅言計自臣始則士豈有不嚮風刎首爭效闕下者哉臣嘗得罪輔臣但天恩未報輒憤激陳言惟皇上察之疏入上覽之大怒云立子為儲帝誰可建者乃謂建帝字為妖言命各科集議禮科給事中藍璧等議坐大逆不道妖言惑眾嵩復擬旨從史之遂比妖言律斬決不待時傳首天下旨下江西撫按官秘之密檄守巡官收希顏希顏不之知也時于家延賓客為子娶婦衣緋待之有僉臬亦衣緋來通謁希顏以為賀已也迎之坐未及語目左右搜之出遂掖赴都指揮司縛繫之無何諸司漸集撫按官亦至乃昇赴市曹斬之傳首天下天下莫不哀之

謹按支進士大綸曰郭公髫年有至性下筆輒數千言余大父官江右見其入試方十三齡而七篇立就不加點竄蓋天才也以直道忤時動遭顛躓晚年一疏理確詞贍有賈長沙風乃不得保首領矧望

前席哉君子於是思剽刃賊蒿之腹矣

南京振武營兵亂殺總督糧儲戶部侍郎黃懋官先是南京原設都御史總理倉場糧儲後裁革令戶部侍郎攝之舊例諸營卒月糧一石無妻者減十之四春秋二仲月每石折銀五錢及馬坤為南京戶部尚書奏減折銀四錢諸軍始怨比坤北轉蔡克廉代坤病不視事時歲大侵石米八錢諸軍又求復原額不得懋官至總督視事為刻削計月糧半支本色半折銀二錢又停補後軍丁妻糧其補伍復役諸卒每每駁覈經歲時不得受糧而諸受糧者遇月小盡祇除三升更嚴覈死亡卒不實則榜其部長諸軍益不堪又故事每月支糧不逾上五日先期下關符待之是月既望關符未下且議先發半糧折值是日振武營卒倡亂分布諸要路遮留諸卒勿赴營令俱至總督府丐月糧眾從之遂走會同館園懋官居第鼓譟不已破關擁入懋官窘迫踰墻欲自避匿墮地

不能起其妻先亡在樞諸卒出其屍掠其含歛及諸橐裝復索得懋官競前撲殺之拽至大中橋縛繫坊上身無完膚鬚髮幾摘盡將銷金紅帳作旗號召遠近搶掠諸店酒食乘醉射懋官屍慘不可言時新江口操卒聞城內亂亦鼓譟擁入四掠商民復突入內殿欲刺守備官不得府部諸大臣聞之急出示諭不聽復脅兵部尚書張鰲求賞鰲錯愕不能應會誠意伯劉世延趨至諭曰爾輩但求賞易耳能從我惟爾所欲眾稍定翌日九卿大會兵部侍郎李遂揚言曰昨黃侍郎之變遂親見其自踰墻死各軍特不當殘辱之即據此奏聞不得稱叛因麾亂軍退眾求賞遂叱曰今日之事若求復妻糧月糧原額即可得求賞不可得朝廷在內爾輩欲何為者乃令人各給銀一兩以補減折糧餉眾始散而都督乃密檄捕首亂周山蔡忠劉鑾滕彪謝學等二十人送刑部鞫訊事聞上降旨曰營卒集眾圍逼部臣必有不得已何緩徐鵬舉李

庭竹張鏊俱有守備責任不能鈐戢俱應究治姑令戴罪視事與侍郎李遂撫輯軍民凡事便宜處治各營軍卒夙受朝廷惠養輒不畏法俱宜重處為首者查名擒治其餘姑念激變所致俱赦免既而法司會鞫周山等二十人謀殺制使皆斬餘從赦原奏入 上謂黃懋官全屍而死已為失刑所獲未必皆為首者再議奏聞刑部復會擬周山蔡忠劉鑾倡亂斬首滕彪等十有七人比矜疑例調發邊衛充軍先是倭寇之亂各處防守張鏊奏立振武營于大教場東招募軍丁一萬四千餘人操練皆遠近克惡投充利在食糧鏊不思此軍年費月糧十七八萬倉廩空乏支給不敷故懋官為刻削計至生此禍率多新投軍人舊軍不預人皆以此罪鏊後振武營卒廢○詔徙山西汾州慶成永和二王府宗室於閔內命有司亟發祿米為營造府第之資以撫按官言二府宗室各散居村落不便閔防故也○湖廣竹谿縣地震出血○三月詔逮

繫祭酒沈坤訊治初坤家居為倭寇督率鄰里以保所居遠近依附者衆有犯令者輒榜笞之故居民雖賴以安而被其榜笞者亦生怨恨至是南京御史林潤論劾坤居鄉暴橫罪狀 上怒其惡逮繫詔獄拷訊坤奏辯不聽竟死獄中○擢兵部左侍郎江東為戶部尚書○詔求天下五色盈尺芝○廣東香山諸縣同日地震聲如雷○大同總兵官劉漢擊虜於灰河破之時虜聚喜峯口外窺犯薊遼漢乘其虛督兵自鎮河口出塞搗虜帳於灰河斬首二十八級虜狼狽西顧自邊鎮多事以來官兵積懦虜留巢並塞無一敢問之者至是漢倡為之嗣後各鎮往往乘間出勦虜始懼稍稍徙遠其幕云○遣御史陳旌溫汝璋往各邊修舉屯政從戶部議也○兵科給事中王文炳請議安民蓄兵絕寇之策言邇者浙直倭患稍寧而閩廣警報踵至蘇松淮揚間博徒悍卒所在繹騷宜勅下本兵議所以安民蓄兵絕寇之策部議安民之策莫若

去不急之務捐無名之征重懲貪官酷吏蓄兵之策莫若訓練各處鄉  
兵至隸籍行伍者則責之軍衛募自民間者則責之有司絕寇之策宜  
令沿海有司按籍所部居民有與盜賊通者許同里首告即置之法仍  
追所犯銀三十兩給賞告者又有無賴惡少竄入軍中巧立報効贊畫  
名色平居坐糜公廩有事曾冒首功此輩亦將來禍本宜一切禁革  
上皆納之○詔議賑濟饑民時近京地方饑荒民流入京者甚衆無所  
得食上憫念之令部臣詳議事宜以聞戶部乃議上五事一議賑流  
聚言宜令戶部錦衣衛各簡其屬十人與五城御史悉錄見在流民發  
太倉米萬石日人給一升至五月終止五月後係百里外者人給五升  
遠者以次遞加至二斗止使還舊業二議濟病弱言凡就賑饑民病不  
能赴官者令所在富戶為糜食之太醫院仍給藥調治三議處游惰言  
凡年力少壯者取其年籍令工部酌議產覓給與工價勿令轉徙四議

處近民如昌平通州諸處宜于太倉通倉各發米五百石付所司分賑  
五議處遠民言宜移咨順天保定巡撫凡應賑之處定擬多寡分數馳  
報本部請發太倉銀折米充賑上俱從之○詔奪巡撫應天都御史  
翁大立官時給事中曾庶論劾大立不職狀吏部覆言大立率易更張  
有失衆心上命還里聽用○虜寇一片石時虜酋把都兒辛愛等擁  
衆數萬以屬夷影克輩為鄉導入寇一片石等關叅將佟登等帥兵禦  
却之追至芝麻灣而還捷聞詔進登等各一級賞總督鎮巡官許論等  
銀幣有差○原任兵部左侍郎張珩卒贈工部尚書謚襄敏珩石州人  
行履高潔器識弘遠尤博綜群籍為御史時輔臣推充侍從講臣疏辭  
不就士論高之○命翰林侍讀張春侍裕王講讀○諭令撫臣撫勦盜  
賊上諭兵部亟示各處巡撫嚴督所司悉心撫勦四方盜賊尚書楊  
博乃條弭盜六事上之一曰罷額外之征言連歲兵荒民於公賦外有

修造買馬治河諸征宜為禁止二曰寬脅從之罪言民之為盜非其得已凡脅從者悉令歸業許其自新宜為榜諭三曰廣賑貸之令言京師饑民已荷賑恤其遠方赤子請行各撫臣便宜賑貸四曰罪捕賊之官言巡撫職官所領軍丁民快有隱匿賄脫者重坐五曰治縱賊之罪言責成有司勤行巡歷慎固封守縱賊不捕者計其多寡治罪六曰申行賞之格言凡捕賊有功者各遵例行賞疏入 上嘉納之○夏四月巡撫鳳陽右僉都御史唐順之卒順之武進人博學強記凡六經子史兵法陰陽以至算射靡不精透嘗願鞠躬盡瘁死而後已及有病廼曰死國吾志今得良死舟中矣遂卒於官詔賜祭葬立祠揚州○改戶部尚書江東為南京兵部尚書加太子少保時張鏊以振武營兵變罷去故改東代之東疏辭太子少保 上手詔追嘉其入餉右衛之功令盡心安撫士卒訓之忠義以奠邦本不允所辭○擢戶部左侍郎高燿為戶

部尚書○罷刑部尚書鄭曉間任降左右侍郎趙大祐傅頤俸二級故事近京軍民有寃得起刑部訴理時御史鄭存仁巡按順天移檄禁民越訴凡法司官擅受民詞有所追取府縣不得輒發曉聞之乃引大明律例及會典中亦載近京犯人得聽法司問理率大祐等上疏論存仁違例侵官存仁亦執大明律自下而上之義論曉等欺罔時覆議未上曉復疏辯 上責其瀆擾特命罷之因命自今一應詞訟在外者屬之有司在京者屬之刑部不許再行爭擾○追賜岳懷王名厚熙王未名而薨 上以歲時齋薦未名不便登籙故諭禮部賜今名云○虜犯遼東廣寧大掠而去○五月勅獎蜀世子宣圻賜以金幣世子進黃金一千兩白金一萬兩助建大工 上嘉其忠悃降勅褒諭仍令加賜金幣○巡視京營給事中蘇景和御史張九功疏請增選戰兵以重訓練 上從之即命景和等會同總督官選兵三大營中得壯士六萬餘人因

復奏請分為二十枝免其工役俱赴各營操練以聽征調增設中軍千戶把總領之報可。○加胡宗憲兵部尚書兼右都御史仍督沿海軍務先是浙福倭寇日熾巡按福建御史樊獻科請赴宗憲赴閩應援巡按浙江御史周斯盛請勅兵部赴宗憲督師勦寇以弭海患宗憲聞命泄泄如故既而寇稍解散乃以功進兵部尚書至是宗憲請稍假以事權得以為諸道主。上因命以大司馬兼院右正沿海撫巡諸官悉聽節制體統如三邊而勲臣總兵者亦由掖門通謁參拜庭下。○擢兵部左侍郎閔煦為刑部尚書。○詔旌慶成王府故鎮國將軍竒添夫人王氏節孝初竒添卒時夫人年甚少養姑育子備嘗勞瘁及是年八十餘逮見孫曾四世山西撫按官疏請旌表故有是命。○詔清查畿內莊田時遣御史沈陽郎中張大紀清理陽等言清出隱冒莊田之數應量給者一萬六千頃有竒應入官者二千五百頃有竒其戚畹枝系未遠而嫡

派已絕本身見存而爵級已革及太監寺觀自買民田而乞買糧差與歸順達官先朝給賞住劄地土共一千九百餘頃俱宜追奪從之。○潞城王府中尉俊彙有罪自殺俊彙謀殺宗人巡撫大同都御史李文進以狀聞。上以俊彙罪重有違祖訓勒令自殺。○南京操江都御史喻時請止設蕪湖叅將從之先是翁大立欲添設叅將於蕪湖而史褒善亦同其議至是時奏安畿輔言狼山金山各有副總兵沿海一帶各有叅將把總則藩籬已為有守淮揚以至嘉湖各有兵備而復有兵備駐劄廣德則門戶已為有守此足以禦外至之賊矣安慶儀真各有守備又有操江巡江分投巡視則堂輿防守又已嚴密此足以禦內發之盜矣使諸群工殫心竭力則天塹屹然料難飛渡不必添設叅將明甚且置將必須增兵增兵必須議食今應天連年倭寇之擾生理未復去歲災傷之後流徙更多正辦錢糧尚爾逋負復加兵餉其何能堪伏乞專

責儀真安慶二守備分定地方時常會哨稍有違誤奉拿處治庶官不增而事亦集賦不加而民自安疏入報可○六月召起原任兵部尚書王邦瑞協理京營戎政○兵部右侍郎魏謙吉卒時謙吉應召赴任卒於道命全給卹典○給事中曾廷芝條陳重守令四事一旌異能言中人之情非激不勸昔漢宣有賜金之典先朝行增秩之令今宜令撫按表其治行高第者以示風勵一破資格言古者用人不問其資如潁川淮揚用治最進位公卿不問何途出也今天下惟甲科為重由舉貢授者即龔黃不齒今宜一洗敝風程較功實毋得以資格軒輊一慎詮除言人情壯多激昂老犯在得今宜察其年貌以憑器使一驗文憑言各官陞轉非部檄至不敢離任近有買憑奸偽非數金不授致使延遲今宜類集各省文憑令出京回任官負順賚以便撫按轉發部議從之○南京禮部侍郎孫陞卒贈太子少保謚文恪陞餘姚人前死節都御史

燧子孝友長厚燧死寧濠之難終身不書寧字亦不為人作壽文事伯兄如父居官被服雅素口不談人過世稱篤行君子云○秋七月上禱雨于宮中既而得雨群臣表賀○戶部左侍郎石永卒贈右都御史永威縣人鯁介廉靖歷官以風裁著稱所至肅然卒之日行李蕭然家無餘儲世稱貞士○大同總兵劉漢破虜於豐州大同右衛邊外由王城舊城而北經二黑河一灰河歷三百里其地曰豐州崇山環合水草豐美叛人丘富趙全李自馨居之築城建墩構宮殿甚宏麗開良田數千頃接東勝川號曰阪升阪升者華言城也富等以白蓮妖術教虜入寇製鈎杆攻城具時俺答引衆西掠閱二年留千騎守老弱夏徙大青山口外避暑惟富等不徙漢與巡撫都御史李文進謀部分叅將王孟夏麻录等五十三人率銳卒三千馳進漢與趙奇以重兵分三哨營于玉林隘為後繼孟夏等羸糧疾馳昧爽鼓譟奮擊斬首八十三級生擒



七十六人焚其宮室餘衆奔匿時富隨虜北徙趙全匿墩上虜騎大至  
我兵引退還渡黑河虜追騎至且戰且却分哨迭戰還與大兵會翌日  
入邊往返凡五日總督葛縉以聞 上大悅令亟加陞賞有差○廣東  
吳川縣地震有聲如雷○巡撫河南都御史章煥疏請經畧中原時南  
征寇警徵歛煩急貪吏肆行水潦屬至民不堪命往往群聚為盜河南  
初傳倭至鳳泗又言開封沒於黃河于是林縣聚賊數千睢州亦聚數  
百犯其南關聞知前言訛傳始皆解散煥乃上言備陳經畧之策以綏  
安地方杜遏亂萌曰屯重兵收梟雋脩城池察險隘時巡歷選良吏處  
宗藩議黃河疏下所司○八月總督尚書胡宗憲獻芝草白龜宗憲得  
芝草五白龜二進獻 上悅命龜曰玉龜芝曰仙芝禮部因請謝玄告  
廟許之百官表賀○福建叛兵攻泰寧破之址率千戶劉兆元百戶戴權等禦之  
百餘人自沙縣將樂攻泰寧破之址率千戶劉兆元百戶戴權等禦之

軍亂兆元率衆先奔址權戰死賊遂趨樂安廣昌尋奔永豐敖城遁去  
巡按御史鄭本立以聞詔贈址都指揮權正千戶各陞襲子孫一級兆  
元等逮問先是福建倭亂調募廣兵多輕悍無賴比憑陵驕蹇日需犒  
賞有司不厭所欲即鼓行為盜云○原任戶部尚書賈應春卒應春真  
定人歷官三十年慷慨任事家居鄉人稱為長者○初設江西興安縣  
屬之廣信府先是上饒弋陽二縣之間有橫峯窰窰民屢變巡按御史  
沈越嘗請設縣未果至是撫臣何遷復以為請戶部議覆可從之○召  
南京工部尚書潘恩為刑部尚書○禮部尚書顧可學卒謚榮僖可學  
無錫人先以叅議病免重賂大學士嚴嵩以煉秋石服食却老薦于  
上獲寵用累至今官然性帶空銜支俸煉秋石供服餌不與聞公家事  
也士論鄙之後奉遺詔褫其官○九月調延綏巡撫董威為南京大理  
寺卿威在延綏職私狼籍士論不齒嘗為慶陽知府孫續續本貪污為

巡撫程軌巡按李秋所劾吏科給事中梁夢龍因奏言三臣舉劾互異部覆軌秋言是乃詔續除名調威別用威素以厚賄結嚴氏父子反得調南京大理卿倒置益甚○虜由拒門堡大川墩諸處入寇進屯朔州復移營而南攻山西盤道梁越閔大掠總督侍郎葛縉上言虜賊初屯朔州臣已遣宣大兵馬西援及賊深入親臨廣武調度第彼衆我寡如直下太原何以待之乞將入衛遊兵三枝併保定勁兵二枝亟赴本鎮共圖戰守既而虜遁報至兵部以聞上計賊必出朔州詔縉亟帥兵赴朔州邀擊之○戊子月掩軒轅左角星○冬十月詔令景王之國上諭大學士嚴嵩等景王府已成數年當遵祖宗大制令之國何不舉行嵩等以示所司于是吏部尚書吳鵬等請如舊制設王府官僚報可時上春秋高國本未定二王並居外邸而景王母妃在上左右奸邪之黨日夜窺伺有識者以為深憂忽聞夜半傳旨京師士民踴躍稱慶

○詔兵部嚴督所司勦捕盜賊時京城內外及畿輔州縣多盜故詔所司嚴捕玩怠者以名聞○以禮部署郎中李纘刑部署郎中高岱為景府左右長史黜中書舍人劉芬為民初吏部議以進士充景府長史芬素性不慧或戲之曰吏部將以爾為之芬大怒即馳往尚書吳鵬家裂冠毀裳掉臂大詈而去鵬以聞詔逮繫拷問黜之○詔免今歲行刑時法司上朝審重囚應決之數上曰今秋天降奇祥欽仰恩賜姑免行刑仍令嚴錮無縱○十一月上禱雪于雷壇時入冬無雪上乃躬禱于雷壇久之雪降時以為靈雪群臣表賀○詔逮繫彰德知府傅汝礪通判田時雨詣京訊治時雨論死汝礪戍邊時趙王厚煜讀書好禮有資行嘗構樓屏妃妾獨處一夕以小蒼頭入侍寢早起為王捫足見王縊於床下大驚呼王妃張氏子成舉王入視已絕翌日長史以病薨計哭臨如禮而外議洶洶言變起宮闈且及成舉王王懼乃以自縊狀

聞而歸罪于彰德知府傅汝礪通判田時雨詔械詣京拷訊汝礪戍極邊時雨以威逼論死械至河南斬之長史以下罪罰有差先是六月間潞川王與民爭田時雨治其奴趙王為營解不聽竟以戍譴十月間湯陰王府將軍從汝礪索糧不與又囚其奴趙王令厚燿詣府丐免辭不見乃見時雨復以語侵之然亦謬悠無足死者深宮秘密事蓋不可知云○詔逮繫總督南京糧儲都御史章煥詣京訊治初煥自淮安改督儲會議督運過淮因留數月仍假道過家于是南京給事中馬負圖等劾奏煥不畏簡書遷延半載乞賜罷黜以懲怠玩上以煥專事談論意本欺謗命逮送法司擬罪議發戍邊煥有文學其上經畧中原疏頗抱憂時之志第其中處畫空疎又當一統全盛之時而為經畧中原之語亦非所宜言故上心厭之至是遂得罪竟死戍所○秉一真人陶仲文卒仲文黃岡人幼習道士祈禳術以吏員為遼東海州庫大使九年考滿當陞正九品寓京守選師事致一真人邵元節乃薦於上得

幸賜坐稱之為師賞賚以數萬計官禮部尚書少保又加少傅少師光祿大夫柱國實封恭誠伯及卒上嗟悼良久葬以伯禮賜謚榮康惠肅○總督薊遼尚書許論獻白玉蟾真蹟一卷論家藏有紫清仙人白玉蟾真蹟至是進獻上嘉其忠款受之○十二月太保左都督陸炳卒追贈忠誠伯謚武惠炳平湖人以尺籍從獻皇帝之安陸其父松事上於潛邸累以從龍功官都督僉事上南幸承天衛輝行宮災炳以身負上出諸火中上德之游膺眷注由列校至左都督無公孤尊寵于廷臣無二身任金吾鈞致奸宄法紀甚肅而豪侈自奉貲產巨萬聲勢震天下是時上數起大獄炳曲為調護保全縉紳又折節廣交以籠聲譽故終嘉靖之世無發其奸者後始以言官論奪其子官籍其家○詔黜密雲管糧戶部郎中劉廓兵備副使張子順為民初廓

與子順有郤嘗陰求其短欲以中之會廓改命山西管糧治裝買四騾以行子順因馳奏廓裝中皆寶貨廓亦許子順尅叩軍糧詔錦衣衛各捕下獄訊之俱無狀坐奏事詐不以實俱黜爲民○以編修趙祖鵬爲湖廣僉事祖鵬以女妻都督陸炳席其權勢因大爲奸利事士論耻之炳卒祖鵬遂外補○火星犯鈞鈐大星○大風揚塵四塞○巡撫陝西都御史程軌巡按御史李秋疏獻白鹿芝草各一云得之部內書堂山萬壽宮中 上以玄祥疊至歸恩天眷賜軌等鈔幣

**辛酉**嘉靖四十年

春正月壬戌朔 上不御殿○戶部尚書高燿會計各邊應發年例軍餉銀數大同四十四萬七千兩宣府二十四萬兩山西一十四萬兩延綏二十七萬五千兩易州五萬三千兩昌平六萬五千兩并究運京倉米二萬石赴密雲一萬石赴昌平通倉小四萬石赴薊州抵年例之數

報可○虜入河西時虜萬騎自河西踏冰渡河寇掠五花營守備王世臣千戶李虎等迎戰於水橋敗死虜遁出邊○巡按直隸御史鄭存仁上言順永保河南四府比歲饑荒乞以贖金一萬兩就彼賑濟 上聞而憫之命亟行賑濟務令各沾實惠○雲南老撾宣慰司土舍怕兵招貢象及龍涎諸香給賞如例○巡按廣東御史潘季馴疏上均平里甲之議從之時季馴議行均平里甲之法先計州縣衝僻以為用度煩簡令民各隨丁力輸銀於官每遇供應及諸公費官為筭銀吏胥承買里長止在官勾攝公務甲首悉放歸農廣人便之季馴自以代者將至恐有變動乃上言嶺表去京師絕遠比年牧民者視為利藪屠剥萬狀而小民仰九重如在雲霄愁苦之聲無路上達故相聚為盜臣將里甲弊政更張一新顧天下之事立法非難守法為難守之於畿輔地固難而守之於嶺海外尤難今廣東之民既感而動若非仰仗明旨丁寧雖有

周公之法誰與守之疏入報可○二月辛卯朔日食不見是日申酉間日當食微陰不見欽天監言日食微陰即回不食大學士嚴嵩等謂日雖有雲而自申至酉日色不加晦應是不食請舉大謝禮從之而禮部尚書吳山乃以救護禮畢報上責之姑令引罪○原任都御史周延卒贈太子太保謚簡肅延吉水人峭直寡言笑居官執法不為矯七声迹清操自持終始不變士論重之○南京錦衣衛指揮徐繼勳獻白兔言得之鳳陽府鳳皇山下遣告大廟群臣疏賀○京師不雨上禱于雷壇既而得雨群臣表賀○景王發京師之國德安府先是郭希顏疏請分封被刑自是館閣臺省無一敢言既而夜半持出宸旨令景王之國至是乃行○諭令差官施藥上諭禮部近因春令人多生疾令太醫院依方修藥隨病治療差官同錦衣衛官于九門分布給散立夏日止○京師大風上諭閣臣曰今日之風占謂兵火其傳諭博示諸臣

內戢兇賊外嚴邊備于是尚書楊博等覆奏言陛下偶以風變軫念內外申飭臣等以安攘之事臣惟今日內地雖稱歲稔然數下寬恤之詔保無他虞惟是外邊自正月以來在薊鎮則有把都兒欲犯古北臣已檄許論拒守在大同則有俺答欲犯左右衛臣以檄李文進防禦今用明詔申督之當不至仰煩聖憂報聞○三月命戶部發米一千二百石賑濟京師饑民○命提督工程工部尚書雷禮還部管事仍兼提督○詔令吏部尚書吳鵬致仕先是御史耿定向論劾鵬罪狀一言鵬屬婿董份主試順天而子紹中以魁選一言給事中袁洪愈御史林騰蛟祭吏部司屬之職賄而騰蛟外補洪愈淹滯以此箝制言官一言文選郎中何海晏驗封員外宗臣各以貪墨被斥而一擢叅政一擢提學一言病夫蔡克廉而擬之司徒沈坤巨惡而陟之祭酒一言私門貨賂幾如開市而反移文撫按禁貪戢穢疏入不報時鵬在吏部一切百司進退

悉聽嚴世蕃即邊方小吏亦無敢自尊公道久湮中外人心咸鄙薄之至是給事中梁夢龍等復劾論鵬上勅令致仕○禮部尚書吳山罷山直亮有時望既以救護日食忤旨上大不悅嘗示風指于臺諫諸臣給事中梁夢龍等遂劾論山請罷之上令閒住○丙子金星晝見至二十四日而沒○擢吏部左侍郎袁煒為禮部尚書○改少保兼太子太保左都御史歐陽必進為吏部尚書○建萬春宮○命禮部尚書袁煒入直西苑供撰玄修○製大祀袞冕皮弁服○改刑部尚書潘恩為左都御史○夏四月原任工部尚書劉麟卒贈太子少保謚清惠麟南京廣洋衛人後居湖之長興先知紹興府以忤劉瑾除名瑾誅起知西安以諫織造忤旨致仕在長興三十年閉戶讀書足跡不入城市貌恂恂長者自守介然不為畛域衆咸愛敬之○大風霾晝晦御史張九功以旱霾陳言五事曰禁賄賂以絕僥倖簡督撫以肅邊鎮省工銀以

塞侵漁平盜賊以安地方恤營軍以蓄國威上俱納之○擢吏部右侍郎馮天馭為刑部尚書○詔申飭治捕盜失事者之罪時巡撫保定都御史霍冀上言比緣民窮多盜而有司衛所長吏及司捕者漫不為意宜如先年河南例凡有衛所州縣長吏同涖一城者若遇失事重大則衛所長吏及巡捕官坐以守備不設罪府州縣官論罷職其無衛所地方則各守令及巡捕官坐以衛所官罪初以師尚詔之亂創此例迄今行于河南不及他省茲者四方盜起請一切通行報可○詔發銀工部鑄錢時上以內庫之錢命取雲南新錢進用戶部尚書高耀言雲南錢係解部鹽銀鼓鑄原備京邊俸糧非進內藏數也上乃止仍令兩京照例發銀二萬兩工部鑄造進用○以三殿迎梁命鎮遠侯顧寰等分祭所過禁門文武大臣翰林科道官奉迎如禮○原任南京協同守備臨淮侯李廷竹以母老陳情乞于南京五府帶俸以便終養許之

○五月大學士李本以母喪去任詔遣官馳驛護歸○池河卒亂罷南京兵部尚書江東回籍聽用時守禦所練卒一卒兄弟更換應役本管千戶吳欽不加懲治輒申南京兵部尚書江東准令見丁應役衆遂倡亂遂縛欽于營臺東聞亟遣官招撫之欽得釋衆始定尋捕首惡九人逮繫訊治事聞乃罷東○詔考察京官時御史唐繼祿以旱蠹為災條上修省十事其黜罰奸庸一事欲令京堂官俱自陳其餘聽部院考察去留疏入報可于是大李士嚴嵩徐階各上疏自陳求退 上勉留之尋吏部尚書歐陽必進率九卿自陳吏部都察院奉旨考察在京諸司官黜降如例○蘇松嘉湖大水時雷雨彌月湖陂俱溢平地水深丈餘禾苗俱沒至十月始退○赤虹亘天晦日將晡赤紅二道自西北徑東南直天者移時始散○閏五月山東萊州府地震○命都督僉事劉顯提督南京振武營顯承新命上言南京營軍習成驕悍宜以法裁制之

臣故所統川兵三千有勇知方乞許便宜帶領隨營操練內以彈厭兇惡外以控制倭夷卒有怙終者許臣以軍法從事俟其內馴外服海防稍靜漸為散遣兵部尚書楊博覆言南京原無前項糧餉請許選精銳五百自隨餘付代者有警聽顯調用 上從部議○詔巡城御史每年終將各城兵馬會本舉劾時南城兵馬周子詩以侵盜車輛工費事覺為管工給事中劉畿所糾因有是命○原任南京兵部尚書屠楷卒贈太子少保謚恭簡楷臨桂人入仕三十年孤立寡交然亦無忤性寡嗜好居第僅避風雨日閉門靜習讀書其中士論高之○南京給事中郭斗請蘇留都坊民言應天上江二縣原無應付事例而公私使者輒以片牘坐索厨傳夫役鼓吹坊民受累請禁抑之其應給者於各附近州縣均徭內編派聽本府差撥毋使偏累二縣部覆從之令南京部院及各撫按官嚴行禁格違者罪之○大學士嚴嵩妻夫人歐陽氏卒 上

諭閣臣曰聞嵩妻果不起夫婦並八十者不多有其示禮臣議卹典後不為例時嵩子世蕃不欲歸而嵩無次子可扶柩旋者嵩乃以情告上設為兩難辭謂已老耄一日不可無世蕃在側上乃特旨留侍養令不必守制喪令孫鵠護歸嵩䟽謝言世蕃例不敢任官支俸上報聞○六月流星隕有光時朔日昏中有星流牛女間墜地大如鷄卵其光燭天○命脩撰唐汝楫充裕王府講官○陝西寧夏固原地震城垣墩臺房舍俱倒塌地裂湧出黑黃沙水壓死軍民無筭○蘭州莊浪天鼓鳴○宣府流夷斬虜來獻先是宣府邊外有流夷史大史二等為黃台吉以威逼屬因用為嚮導內訌永寧龍門關頗被擾害台吉淫霍史夷妻女及所部夷婦有色者多為所漁史夷乃怨恨之累求內附保塞邊臣疑其有詐令殺虜自効以為徵信史夷兄弟乃斬台吉首領思克等十餘人以俘馘來獻守臣以聞詔賞史夷金幣有差○罷刑部尚書馮

天馭以給事中侯廷桂劾其庸鄙故也○建仁和宮○詔罷總督薊遼兵部尚書許論時戶科給事中鄭茂言各邊錢糧虛糜之甚奏討之多莫過薊鎮臣查嘉靖三十六年邊餉密雲止八九萬今三十四萬有奇昌平止四五萬今一十四萬有奇何前後懸絕若此總督許論在鎮三年一卒未練而糧餉獨倍往昔侵冒之弊誠不能無宜專勅風憲大臣赴邊計議上是其言遂令論罷歸聽覈以楊選為兵部侍郎代論總督○秋七月己丑朔日食時日食一分五秒例免救護禮部尚書袁煒上言皇上以父事天以兄事日群陰退伏萬象輝華是以日位旺榮氛稜銷鑠食止一分與不食同臣等不勝懼忭上以為然而悅之○召南京刑部尚書蔡雲程為刑部尚書○故黔國公沐朝輔夫人陳氏獻銀三千兩助大工賜銀幣詔雲撫按官以禮獎諭○萬春宮成○虜犯宣府分數道入副總兵馬芳等督兵禦之擒其酋十四人俘斬十八人



獲馬二百四十餘匹虜遁出邊○巡撫應天都御史方廉請修水利言蘇松常鎮四郡水利甲于天下宜備查應修之處分別工程難易以次興工河夫銀兩編征追補如故仍請復設水利通判勅兵備憲臣往來督課之部議允行○八月田官獻嘉穀時御田產嘉穀異穎同本者四十有九田官以獻群臣表賀○兵部尚書楊博疏陳守禦機宜詔行之先是上諭大學士嚴嵩等曰自博入朕每慮邊務今秋恐有擾者其語博早定策以遏之博因言九邊以薊鎮為重虜酋俺荅等潛形不露竊恐謀窺薊鎮伏承宸慮謹條六事以獻上以所奏事宜悉令施行○原任禮部尚書孫承恩卒承恩華亭人卒贈太子太保謚文簡○九月詔戒諭晉王先是太原知府於惟一在郡潔已任事節財愛民歲飢設法賑濟全活以數千計前歲虜入鴈門總兵王懷邦率眾避入會城軍士標掠於市惟一執而撈之驅其眾於城外及懷邦以失事被劾屬

惟一問狀惟一論懷邦罪當死巡撫都御史孟淮時奏免防秋民壯盡徵折價及虜入懷邦以是扶淮欲上書發其奸與之俱死淮乃諭惟一令寬懷邦罪惟一執之益堅淮大恚恨乃劾調惟一太原士民如失怙恃於是晉王上言惟一在郡得軍民心請留之上不悅乃戒諭王毋得妄有干預仍下巡按御史逮問長史承奉等官以聞○降勅諭珉王定燿禁制宗室王奏言臣僻在邊隅密邇洞苗土人故為夷風所染不習禮義比者宗人蕃衍日就驕佚或收方士燒煉或強掠良人子女或詐索軍民財物或結無賴遊畋或鼓噪夜遊城市本府公事稱疾不赴臣以前後勅諭宣示禁約歷年久遠欺玩如故乞重降勅諭頒示藩封俾臣奉以從事上從之令改勅賜王嚴加鈔束○虜犯居庸關官軍禦之總兵姜應熊先進遇虜於南溝虜縱騎圍之應熊身被五創墮馬叅將胡鎮麾所部兵力戰射傷數虜奪應熊以歸虜遁去○詔給各邊

火器 上諭輔臣曰朕聞虜入已久恃各邊有備賊稍知畏可于諸城  
堡遍給火器以禦之仍堅守勿戰以仰奉上天保佑之意于是兵部尚  
書楊博言今歲虜謀異常在西者分入密雲以誘我薊西之兵在東者  
分屯遼右以窺我薊東之急大意垂延畿甸欲為深入之計今塞外早  
寒勢無能為臣謹如聖諭傳示邊臣 上曰然薊鎮火器工部亦以時  
多給之○詔脩景王湖廣府第○原任南京戶部尚書盧紳卒紳咸寧  
人性誠慤務修實行孝友恭儉閑中士人咸則之○冬十月詔遣戶部  
大臣往覈薊鎮宣大邊餉先是 上屢諭大學士徐階以虜患當備階  
上言金城湯池無粟不守今諸邊言缺食甚苦而戶部稱給發已多中  
間弊源必有所在乞諭戶兵二部根究清理乃久安之策也 上然之  
欲治諸奸貪階復上言奸貪侵冒其弊最大其次亦有二端曰民運拖  
欠不行催徵給發日多給發後時糴買價貴故得最少須本末兼理庶

幾有益 上然之因諭遣戶部侍郎一人前往薊鎮宣大清理邊餉務  
先治奸貪次釐時弊于是命總督倉場右侍郎林應亮往吏部又言應  
亮謹原有餘明敏不足而二鎮弊端蝟集兵馬單怯總理之責非所能  
勝宜及其未行改命練達勤敏者代之 上允其請下大臣再推因調  
應亮于南京而以僉都御史霍冀總理宣大薊鎮糧餉既而給事中張  
益言皇上軫念邊餉特勅大臣往理慮甚遠也第稽查糧餉者戶部之  
職本部左侍郎劉大賓右侍郎趙貞吉廷臣舍弗推而以霍冀應詔惟  
二臣才識不逮故公論去之宜令致仕乃命罷大賓貞吉俱聞住○初  
令南畿人不得典南試先是中允吳情典應天鄉試同邑中者十有三  
人時論大譁言臣復劾論情試錄已刊屢行更易副考胡杰不能匡救  
乃謫情廣東市舶提舉杰廣平通判南畿人不許典南試自此始○詔  
令總督浙直兵部尚書胡宗憲進兵勦賊先是南贛盜起殺副使汪一

中至是兵部尚書楊轉言江西之寇始於南贛賊集合廣西叛兵益以本鄉惡少遂至蔓延不制前奉詔督責諸臣以九月報平今且過期不效請更申飭刻期蕩平仍令照邊方事例半月一馳奏賊情御史段顧言生長邊鄙素聞韜畧可就委以兵事海道副使譚綸嘗練士兵足稱智勇今以守制固籍宜令墨衰效用以靖地方且閩廣之賊所倚重者數巢穴耳使以勁兵乘虛擣瑕攻其必救賊必牽于內顧乃可平定上令宗憲督率進勦餘如議行○准王厚壽獻白鴈時王得白鴈於鄱湖遣使進獻群臣表賀○十一月以禮部尚書袁煒為武英殿大學士叅預機務時上漸有疑大學士嚴嵩意密諭大學士徐階舉堪輔政者階密奏言傳云人君以論相為職夫百官孰非當論而獨云爾者以相位高任重必由人君自論然後見恩自上出而命且上制也惟乞皇上斷自宸衷簡用一二與臣等同事則政體明而窺伺陰阻之私自杜

上乃特命煒以學士入閣○詔令吏部尚書歐陽必進致仕改郭朴為吏部尚書先是故兵部尚書湛若水曾孫壽乞贈祖官吏部覆言若水學行醇正士望所歸宜允其請上怒曰若水偽學亂正乃為誇譽其以狀對必進惶恐謝罪上責其徇情沾譽詔奪少保兼太子太保止以尚書供職既又以戶部侍郎不堪位而不言降俸二級至是以禮部尚書缺會推郭朴上言文撰諸臣又不擅改茲以朴擬在例內何也其以狀對必進等謝罪上以必進往固勤慎自速轉後百凡專肆大失大臣體姑與致仕員缺朴即代之諭朴勿辭朴上章陳謝上褒諭口卿性資醇謹撰奉勤誠遵命即任朕心加悅宜慎評庶職先於守令以副簡用至意○萬壽宮災萬壽宮在西苑本成祖舊宮自壬寅宮闈之變上即移寓于此不復居大內是夜火作禁衛皆不救乘輿服御及先世寶物悉燬○十二月詔營萬壽宮上暫寓玉熙宮工部尚書

雷禮言王熙宮殿湫隘且地曠近水非可久御萬壽宮係皇祖受命重  
地王氣攸鍾偶值災變實天啟皇上俾鼎新丕基永延億載之祚及時  
營繕以承明眷 上曰郊廟謝罪禮成是日風歲氣爽皇天赦憫眷與  
當承其重建之禮言重建御宮事體隆重請如殿工例容臣朝夕督稽  
夫匠從之○命左都督朱希孝入直西苑仍令親率官校環衛大玄都  
四面及西安門侍郎葛縉亦令率營兵入衛于是鎮遠侯顧寰自以職  
典京營當一體効勞援繙例請許之○贈故江西副使汪一中妻宜人  
程氏為淑人命有司建坊立祠祀之初一中既陣亡程氏痛其夫死于  
非命扶柩至家絕口不食而死巡按御史王蒼以聞故有是命○協理  
戎政兵部尚書王邦瑞卒贈太子少保謚襄毅邦瑞宜陽人嚴毅有執  
器識甚偉歷官四十餘年以廉節著稱至是卒于官○召起原任南京  
兵部尚書江東為兵部尚書協理京營戎政仍加太子少保如舊○命

選京營兵眷戍時兵部尚書楊博以京營之兵頻年坐食漸成驕惰廢  
議摘選番戍條上四說一言使京軍習見烽燧涉歷勞苦可以轉弱為  
強二言居庸鎮邊警報絕少即使有警去京甚近朝發夕至視調宣大  
保定之兵勞費頓殊三言春防之日本鎮止留邊兵二枝一遇虜警顧  
此失彼誠得京兵守戍使邊臣專守古北口在此為虛聲在彼為實用  
四言部署已定可視春來緩急為進止不至虛發以耗芻糧 上是其  
議○詔重刊衛生易簡方書前禮部尚書胡濙所進也 上好醫藥置  
一部凡案間時加檢閱間有脫簡命禮部繕印全帙進覽時故板亡失  
過半禮部乃請購民間善本重刻以廣其傳詔可○總督薊鎮宣大糧  
餉戶部右侍郎霍冀條上薊鎮事宜曰清虛耗重調遣禁冒支限遠近  
防冬議監價給年例戶部議覆從之



